

四庫全書

經部

欽定四庫全書

經部

周禮集說卷三

詳校官監察御史_臣邱文愷

刑部郎中_臣許兆椿覆勘

總校官庶吉士_臣何思鈞

校對官中書_臣石鴻緒

謄錄監生_臣王永鎮

欽定四庫全書

周禮集說卷二

醫師

王士二人下士四人府二人史二人徒二十人

注疏醫師衆醫之長諸醫皆在此者如食醫和飲食膳羞故設在飲食之間也雜說或曰醫師職固不可廢又有獸醫等五官皆醫事也豈不冗官哉殊不知執技以事上皆世守也記曰醫不三世不服其藥

古人謹疾如此而欲以一人兼二三之職其能精乎
曰食醫調王之飲食不當無治萬民之疾病瘍醫察
外證不當兼內證獸醫既已兼治病瘍不當又治人

官制曰醫師漢少府本朝御藥院

掌醫之政令聚毒藥以共醫事凡邦之有疾病者疔瘍
者造焉則使醫分而治之歲終則稽其醫事以制其食
十全為上十失一次之十失二次之十失三次之十失

四為下

疔匹婢反瘍音羊
稽古兮反後倣此

疏曰醫師掌衆醫故掌其政令 王氏曰毒藥若五

毒五藥聚之所以共衆醫之用 劉氏曰藥有州土

之宜採取之候治煉之方攻療之制悉預知之然後

可以共醫事也 注疏疾輕而病重疾甚曰病疣頭

瘍亦謂禿也身瘡曰瘍分之者醫各有能 王氏曰

凡人以血氣為營衛氣壅遏而不通則有疾病血凝

結而不流則為疔瘍疾病則使疾醫治之疔瘍則使

瘍醫治之 程氏曰歲終總攷計之總所治愈不愈

之狀而制其食祿分為五等之差十全為上非謂十人皆愈為上若十人不幸皆死者則奈何但知可治不可治者十人皆中則為上 王氏曰餼廩稱事然後能者勸不能者勉 雜說不曰祿而曰食者廩之而已不假之以名器也

食醫

中士二人

雜說食醫專和王食 王氏曰易之頤君子以節飲

食益疾病之起本於氣體之不和始於飲食之不節
蓋飲食人之本也本得其養無物不長本失其養無
物不消於無事之時而順適之有道疾病何自至哉
此食醫所以設也

掌和王之六食六飲六膳百羞百醬八珍之齊凡食齊
眠春時羹齊眠夏時醬齊眠秋時飲齊眠冬時凡和春
多酸夏多苦秋多辛冬多鹹調以滑甘凡會膳食之宜
牛宜稌羊宜黍豕宜稷犬宜粱鴈宜麥魚宜苽凡君子

之食恒放焉

六食音嗣齊才細反和胡卧反徐音杜菰音孤放甫往反

缺

氏曰六食六飲六膳百羞百醬八珍膳夫所以饋

王者調和其味使厚薄多寡各適其節焉春為陽中而其氣溫而食齊眊之飯宜溫也夏為陽盛而其氣熱而羹齊眊之羹宜熱也秋為陰中而其氣涼而醬齊眊之醬宜涼也冬為陰盛而其氣寒而飲齊眊之飲宜寒也先王以一身而備四時之和其知善養之道乎春於五行行為木木之味酸春主發散宜多酸以

收之夏為火火之味苦夏主解緩宜多苦以堅之秋
為金金之味辛秋主摯斂宜多辛以散之冬為水水
之味鹹冬主堅栗宜多鹹以粳之 黃氏曰滑所以
調之慮其不通也甘所以調之慮其不和也甘在內
則養脾在外則養肉四行無土不可四味無甘不可
此甘之所以調歟竅者氣之所由以通者也竅不利
則氣窮焉此滑之所以調歟 注疏曰此五味亦見
洪範及月令 王氏曰黃帝素問曰肺欲收急食醋

以收之肝欲散急食辛以散之心欲栗急食鹹以栗之腎欲堅急食苦以堅之脾欲緩急食甘以緩之亦謂是也 鄭氏曰會成也謂其五味相成稌稷也苽彫胡也 黃氏曰牛羊豕犬鴈魚天產也以爲膳所以養人之精稌黍稷粱麥苽地產也所以養人之形精不足於養則氣衰形不足於養則氣殆然則膳食之養不可相廢其宜不可相反所宜或失焉則所養適足以害之耳 王氏曰謂之常則不可以一日廢

之矣 楊龜山曰所以養陰陽之氣不可偏勝凡此
皆衛生之道也先王於食有醫所以治未病也凡百
君子所以自養者常狂放如此至於疾而後用醫則
末矣故周官疾醫施於萬民而君子不與焉 謝氏
曰古人欲心則寡衛生之道則盡矣 黃氏曰凡齊
所眡和所多會所宜節王之欲可謂備矣是故王心
常清不為物所淫王體常寧不為物所傷然後能以
禮義節人之欲焉

疾醫

中士八人

雜說疾醫專治內證

掌養萬民之疾病四時皆有癘疾春時有瘡首疾夏時有痒疥疾秋時有癘寒疾冬時有嗽上氣疾以五味五穀五藥養其病以五氣五聲五色眡其死生兩之以九竅之變參之以九藏之動凡民之有疾病者分而治之死終則各書其所以而入于醫師

瘡音消痒以掌反疥音介嗽西豆反上時

掌反竅
凡弔反

王氏曰善醫者審其源貴乎養之為本養之使其形
氣和平而無過不及之偏也夫陰陽判而為五行五
行運而為四時或為寒暑或為溫清資其氣以生者
孰不為之感動哉善攝生者消息盈虛與時偕行故
邪氣不能以襲之不然客邪輒蹈其舍則疾病交作
四時所以皆有癘疾也癘疾者氣乖癘而不和之謂
王介甫曰素問曰冬傷於寒春必病溫夏傷於暑

秋必痲癰方冬時陽為主於內寒雖入之勢未能動
及春陽出而陰為內主然後寒動而搏陽故有痲首
之疾痲酸痛也方夏之時陰為主於內暑雖入之勢
未能動及秋陰出而陽為內主然後暑動而搏陰為
癰寒之疾 王氏曰疥生於皮膚夏陽溢於皮膚故
有痒疥之疾咳嗽也其原主於肺氣屬金而主聲冬
陽溢於臟腑則肺動而為嗽上氣之疾矣 鄭氏曰
五味酸苦甘辛鹹五穀麻麥黍稷豆五藥草木蟲石

穀 東萊曰先五味五穀而繼之以五藥治病以藥
醫之下也雖然豈獨醫哉 王氏曰五氣則五臟所
聚之氣心氣熱肝氣溫脾氣和肺氣涼腎氣寒是也
五聲則言語所出之聲宮聲和商聲剛角聲清徵聲
疾羽聲弱是也五色則面貌所發之色木色青火色
赤金色白水色黑土色黃是也望其氣矣又聽其聲
聽其聲矣又觀其色以此三者審其旺相休廢與其
相生相勝而死生可以預知 疏曰兩參之者重審

驗之 鄭氏曰九竅陽竅七陰竅二 劉氏曰九竅失其常職謂之變以五氣失之於中而九竅失之於外故曰兩之 鄭氏曰正臟五肺心肝脾腎又有胃膀胱大腸小腸歲之動謂脉至與不至者曰死老者曰終所以治之不愈之狀也醫師得以制其食且為後治之戒 劉氏曰聖人之仁所以及於後世者又見於是書矣

瘍醫

羊瘍音

下士八人

鄭氏曰瘍創癰也

雜說瘍醫專治外證

掌腫瘍潰瘍金瘍折瘍之祝藥劑殺之齊凡療瘍以五
毒攻之以五氣養之以五藥療之以五味節之凡藥以
酸養骨以辛養筋以鹹養脉以苦養氣以甘養肉以滑
養竅凡有瘍者受其藥焉

折時設反劑音
刮齊才細反

王介甫曰腫瘍聚而不潰潰瘍潰而不聚金瘍刀創
未必折骨折瘍折骨未必刀傷素問曰上古移精變

氣祝由而已醫之用祝尚矣而瘍尤宜祝後世有以氣封瘍而徙之者蓋其遺法祝之不勝然後用藥藥

之然後剮剮之然後殺

鄭氏曰祝當為注者謂附著藥也

鄭氏曰

剮刮去膿血殺以藥食其惡肉止病曰療攻治也五

毒五藥之有毒者作之合黃整置石膽丹砂雄黃礬

石磁石其中燒之三日三夜其烟上著以雞羽取之

以注惡瘡肉破骨則盡出 王氏曰五氣即五臟之

氣 王介甫曰疾醫以治內為主故先味而後藥瘍

醫以治外為主故先藥而後味 王氏曰肉以骨為
體骨收則強故以酸收之肉以筋為節筋散而不攣
故以辛散之脉所以行血脉栗則和故以鹹栗之氣
所以充體氣堅則完故以苦堅之肉緩則不壅故以
甘緩之竅利則不滯故以滑利之且腎主骨腎水屬
也故欲收肝主筋肝木屬也故欲散心主脉心火屬
也故欲栗肺主氣肺金屬也故欲堅脾主肉脾土屬
也故欲緩至於竅則以骨為體以肉為包所以通氣

也素問曰骨肉滑利可以長久惟滑則無所凝止則竅以水屬也故以滑利為主

獸醫

下士四人

鄭氏曰獸牛馬屬 王氏曰先王愛民以及物雖物之微無不治焉可以為仁之至也

掌療獸病療獸瘍凡療獸病灌而行之以節之以動其氣觀其所發以養之凡療獸瘍灌而劑之以發其惡然

後藥之養之食之凡獸之有病者有瘍者使療之死則

計其數以進退之

食音嗣

王氏曰疾與瘍同醫賤物也夫獸不能言則病狀難知必灌之以藥使行焉又從而節止之以是而動作其氣因以觀其病之所發而養之則其病可療矣瘍結於外其狀為易知故先灌而攻之以刮去其膿血而發其惡然後藥以療之養以息之食以肥之此療獸瘍之序也 劉氏曰死則計其多少之數以進退

其食故醫者憚乎其退而獸之病者瘍者可愈而無不愈矣

酒正

中士四人下士八人府二人史八人胥八人徒八十人
鄭氏曰酒正酒官之長 疏曰酒與膳食相將故在
此 官制曰以下亦猶漢少府本朝御前供奉官

掌酒之政令以式灋授酒材凡為公酒者亦如之辨五
齊之名一曰泛齊二曰醴齊三曰盎齊四曰緹齊五曰

沈齊辨三酒之物一曰事酒二曰昔酒三曰清酒辨四
飲之物一曰清二曰醫三曰漿四曰醕掌其厚薄之齊
以共王之四飲三酒之饌及后世子之飲與其酒凡祭
祀以灋共五齊三酒以實八尊大祭三貳中祭再貳小
祭一貳皆有酌數唯齊酒不貳皆有器量共賓客之禮
酒共后之致飲于賓客之禮醫醕糟皆使其士奉之凡
王之燕飲酒共其計酒正奉之凡饗士庶子饗者老孤
子皆共其酒無酌數掌酒之賜頒皆有灋以行之凡有

秩酒者以書契授之酒正之出日入其成月入其要小宰聽之歲終則會唯王及后之飲酒不會以酒式誅賞

泛方劒反盜烏浪反緹音
體醫於己反配以支反

王氏曰酒正酒官之長故掌政令式其給用之式若米麴多寡之數法其造釀之法若水火齊量之差酒材則凡資之以為酒者皆是月令曰乃命大酋秣稻必齊麴蘖必時湛熾必潔水泉必香陶器必良火齊必得是也授授酒人使造之 疏曰凡為公酒為公

事而作者若鄉飲酒鄉射之類亦以式法授其材使釀之也 王氏曰五齊用以祭祀非人所飲也每有祭祀其造作必有量數故曰齊焉祭祀之酒不致其味致其義而已故曰辨名以名者義之所自出也

鄭氏曰泛者成而滓浮泛泛然如今宜成醪矣醴猶體也成而汁滓相將如今恬酒矣盎猶翁也成而翁翁然葱白色如今鬱白矣緹者成而紅赤如今下酒矣沈者成而滓沈如今造清矣自醴以上尤濁縮酌

者益以下差清 王氏曰三酒以飲務致其實而已
故言辨其物事酒酌有事者之酒昔酒昔熟而久者
也酒生則清熟則醇清酒酒之上者也詩或言祭以
清酒或言清酒百壺盖酒清則為近本故事神接人
之際皆以清酒為尚焉 鄭氏曰清謂醴之滓者醫
內則所謂或以醪為醴凡醴酒釀醪為之則少清矣
漿今之載漿也王氏曰米汁相將也醪今之粥內則有黍醪醪
飲粥稀者之清也 陳氏曰酒正四飲清醫漿醪而

無水醴涼漿人六飲水漿醴涼醫酏而無清水涼之
味薄非酒正所辨酒在飲中非用漿人之法內則無
水涼醫亦以其薄而略之 疏曰五齊已下並與酒
人漿人所作故直云掌其厚薄之齊共之于王則陳
設之所謂饌也后世子共之而已 陳氏曰凡祭祀
天地宗廟社稷諸神皆有五齊三酒 疏曰祭有大
小酒有多少各有常法以共之五齊五尊三酒三尊
鄭氏曰大祭王服大裘袞冕所祭也中祭王服鷩

冕毳冕所祭小祭王服絺冕玄冕所祭 陳氏曰濁
莫如五齊而其味薄清莫如三酒而其味厚祭祀有
五齊以神事之尚質也有三酒以人養之尚味也酒
正共五齊三酒以實八尊皆陳而弗酌所以致事養
之義也非此八尊所實齊酒而皆有貳以備乏少也
大祭所酌度用一尊則以三尊副之中祭度用一尊
則二尊副之小祭度用一尊則以一尊副之皆酌而
獻所以致事養之用也禮運曰玄酒在堂醴醕在戶

案醖在堂澄酒在下皆設而弗酌者也

鄭氏曰三貳再貳一貳者

就三酒之尊以盆之盆之者以飲諸臣若今常滿尊也齊酒不貳以祭不盆也為尊者質不敢副盆祭祀必用五齊至敬不尚味而貴多品
林氏曰八尊所實五齊三酒則無尊以副盆之而其尊所實亦皆有器量謂其設而弗酌也故有器量無酌數
鄭氏曰酌器所用注尊中者

數量之多少未聞禮酒王所致酒也 王介甫曰建

國則王立朝后立市祭祀則王耕以共齎盛后蠶以為祭服王獻尸后亞裸王親牽牲后薦徹豆遷賓客則亦王裸獻后亞之王致酒后致飲夫婦相成之義

也 鄭氏曰糟醫醢不沛者也 王氏曰其士下士

也 鄭氏曰共其計者獻酬多少度當足也 王氏

曰燕以示慈惠取醉而已然當防其過故共其多少

之計使之不節而自戒至尊不可以有司法數拘之

故但共其計而已 鄭氏曰無酌數要以醉為度

王氏曰大宰於匪頒賜予皆有式法而酒正於酒之

賜頒亦有法以行之傳曰名位不同禮亦異數是已

鄭氏曰秩酒所秩者謂老臣王制曰九十日有秩

王氏曰授以書契者使知所得之數執以取酒也酒正之出出以給用也日入其成旬計也月入其要月計也入其書於小宰使之聽之以其執九式之貳當守出納之正止其不如法者也於酒特謹其出異於餘物先王防患之意可謂微矣豈特是哉曩有舟以示其沈溺之禍尊有壘以示其浸淫之患觚言其窮而為孤散言其窮而至於散先王於用禮每每致戒焉况給用之際乎歲終則會則一歲用酒之數總

計其多寡而入於大宰唯王及后不會雖世子亦會之所以防荒侈也以酒式誅賞者酒正於授酒材之初既有給用之式則於造成之後必以式計其贏不足美惡之數如式者賞不如式者誅

酒人

奄十人女酒三十人奚三百人

注疏奄精氣閉藏者不稱士亦府史之類 王介甫曰民有是疾先王因擇而用之與遽篠蒙鏐戚施直

罇聾聵司火聾聵脩聲同若以是為刑人則國君不
近刑人而況於王乎若以為刑無罪之人而任之則
宜先王之所不忍也官制曰後世儒者又疑先王
之世猶用奄人却不知這一項只恐不是天官領也
它前皆領於天官則許多人却自有數此所以無可
慮疏曰女酒女曉解作酒者奚給使者女酒與奚
為什長若胥徒也奚三百人造酒須人多也

掌為五齊三酒祭祀則共奉之以役世婦共賓客之禮

酒飲酒而奉之凡事共酒而入于酒府凡祭祀共酒以
往賓客之陳酒亦如之

王氏曰酒正酒官之長故於五齊三酒特辨其名物
而已酒人則受酒材於酒正而造釀之故曰掌為五
齊三酒世婦宮卿之官掌女宮之宿戒及祭祀比其
具酒人則共其物又奉其事以為世婦所役也王
介甫曰饗以訓恭儉爵盈而不飲所以為禮而已故
饗酒謂之禮酒燕以示慈惠燕酒謂之飲酒凡事共

酒入于酒府者入于酒正之府也酒正掌辨酒物及厚薄之齊故凡事之用酒必酒正眡焉而後共之祭祀共酒以往則自有奉之者往待其令而已賓客之陳酒掌客所謂壺四十皆陳之類 雜說成王酒誥渠渠之意止以祭祀為說其說為人子者當孝養父母而不敢飲其為臣者當惟王正事而不敢飲其里居者則以助成王德顯不惟不敢亦不暇其叙所聞則亦在昔商先哲王迪畏天顯小民不敢自暇自逸

是則君臣子民等皆不當飲唯祭祀賓客方用之立法如此之嚴正與酒人酒正相為表裏

漿人

奄五人女漿十有五人奚百有五十人

䟽漿人掌王六飲飲與酒類故在此

掌共王之六飲水漿醴涼醫酏入于酒府共賓客之稍禮共夫人致飲于賓客之禮清醴醫酏糟而奉之凡飲共之

鄭氏曰王之六飲亦酒正當奉之醴醴清也涼今寒粥若糗飯雜水也酒正不辨水涼者無厚薄之齊

王氏曰六飲大槩煮醕而為之以其味薄而淡則謂之水 鄭氏曰稍禮非殮饗之禮賓客淹留而稍給之者漿人所給亦六飲而已 王氏曰夫人有致飲于賓客之禮猶冢宰之有所賜予也蓋上下內外小大相成焉禮之所以立也凡飲共之凡用飲皆共之

凌人

凌力
證反

下士二人府二人史二人胥八人徒八十人

鄭氏曰冰室曰凌詩云二之日鑿氷冲冲三之日納于凌陰 林氏曰周官凌人之掌氷上以法天時下以防人患

掌氷正歲十有二月令斬氷三其凌春始治鑑凡內外饗之膳羞鑑焉凡酒漿之酒醴亦如之祭祀共氷鑑賓客共氷大喪共夷槃氷夏頒水掌事秋刷

鑑胡暫反
刷所劣反

鄭氏曰正歲夏正也季冬火星中大寒氷方盛之時

也三其凌三倍其冰備消釋也鑑如甄

直偽反

大口以

盛冰置食物于中以禦溫氣春始治為三月將獻羔而啓冰也醴酒見溫氣亦失味故亦鑑焉夷之言尸也尸之槃曰夷槃廣八尺長丈二尺深三尺漆赤中實冰于槃中置之尸牀之下欲以寒尸也夏暑氣盛王以冰頒賜群臣則主其事刷清也秋涼冰不用亦可以清除其室 疏曰左傳昭四年大雨雹季武子問於申豐曰雹可禦乎對曰聖人在上無雹雖有不

為灾古者日在北陸而藏冰

夏十月

西陸朝覲而出之

夏三月

其藏之也深山窮谷固陰沍寒於是乎取之其

出之也朝之祿位賓食喪祭於是乎用之其藏之也

黑牡秬黍以享司寒其出之也桃弧棘矢以除其灾

其出之也時食肉之祿冰皆與焉大夫命婦喪浴用

冰祭寒而藏之獻羔而啓之公始用之火出而畢賦

三月四月中

自命夫命婦至於老疾無不受冰山人取之

縣人傳之輿人納之隸人藏之夫冰以風壯而以風

出其藏之也周其用之也徧則冬無愆陽夏無伏陰
春無淒風秋無苦雨雷出不震無蓄霜雹厲疾不降
民不夭札今藏川池之水棄而不用風不越而殺雷
不發而震雹之為灾誰能禦之七月之卒章藏冰之道
也王氏曰藏冰將以備暑而亦所以達陽出水雖
以禦暑而亦所以助陰夫陰陽之氣流行於天地之
間一氣之不至則閉塞而為灾一氣之或過則乖戾
而為疾善防患者或養其弱以抗其強故方陰之盛

而陽之微也則鑿冰以達陽或損其有餘以補其不足故方陽之隆而陰之消也則出水以禦暑如此則無愆陽無伏陰無閉塞乖戾之患矣先王裁成天地之道輔相天地之宜以左右民如此

籩人

奄一人女籩十人奚二十人

注疏竹豆曰籩女籩女之曉籩者其職掌四籩之實是薦羞之事故在此

掌四籩之實朝事之籩其實麴蕒白黑形鹽臠鮑魚鱠
饋食之籩其實棗栗桃乾榛榛實加籩之實淩芡桌脯
淩芡桌脯羞籩之實糗餌粉餐凡祭祀共其籩薦羞之
實喪事及賓客之事共其薦籩羞籩為王及后世子共
其內羞凡籩事掌之

麴方弓反蕒扶文反鱠所求反榛
音老榛反巾反桌古栗字糗音朽

餌而志反
餐昨資反

鄭氏曰籩之容實皆四升 王氏曰朝事饋食加籩
羞籩所謂四籩也先王於祭祀內盡志以致其內心

外盡物以致其外心水草之菹陸產之醢則細物備矣三牲之俎八簋之實則美物備矣昆蟲之異草木之實則陰陽之物備矣凡天之所生地之所產而可薦者莫不咸在一物不可遺則一器不可缺籩豆俎簋禮之器也器以薦物而致禮則籩豆之事各有司存此籩人醢人之職所以立也非特掌其器併其實而掌之 薛氏曰古者祭祀宗廟有九獻之禮一獻王裸二獻后裸三獻王薦腥四獻后亞獻於是薦朝

事之豆籩各八五獻王薦孰六獻后亞獻於是薦饋
食之豆籩各八七獻王醑尸八獻后醑尸於是薦加
事之豆籩各八 劉氏曰既醑尸畢后又獻羞籩羞
豆各二而諸臣進以醑尸焉是為九獻 注疏熬麥
曰麴麻子曰蕒熬稻米曰白熬黍米曰黑築鹽以為
虎形謂之形鹽春秋傳曰鹽虎形膾以魚肉為大饗
鮑以魚於楅室中糗乾之鱠乾魚也是為朝事八籩
乾榛乾梅也榛似栗而小饋食止有五物其於八籩

仍少三其間有乾濕物足之為八也淩芰也芡鷄頭也粟與饋食同此四物重言之則八籩也糗餌粉餐此二物皆粉稻黍米所為也合蒸曰餌餅之曰餐糗擣粉熬大豆為餌餐之粘著以粉之耳餌言糗餐言粉互相足也此為二籩 王氏曰凡祭祀非止宗廟也 注疏薦羞皆進也未食未飲曰薦先薦後獻也若朝踐饋獻時未獻前所薦之籩豆朝事饋食也既食既飲曰羞若尸食後醕尸訖所進羞即加籩之

實也賓客之事謂燕饗時喪事謂殷奠時也 籩人

醢人皆不言共王及后世子之內羞而曰為王及后
世子共其內羞則此內羞非共王及后世子乃后世
子以此內羞共禮事而籩人醢人為之共之也世婦
及祭之日涖陳女宮之戒凡內羞之物則此內羞所
共為祭事矣

醢人

奄二人女醢二十人奚四十人

注疏醢豆實也不謂之豆此官主醢豆不盡盛醢也
亦有腳腫曉截之屬掌四豆之實亦是薦羞故在此
女醢女之曉醢者

掌四豆之實朝事之豆其實韭菹醢醢昌本麋鷄菁菹
鹿鷄茆菹麋鷄饋食之豆其實葵菹羸醢脾析麋醢蜃
蚳醢豚拍魚醢加豆之實芹菹兔醢深蒲醢醢箔菹鴈
醢筍菹魚醢羞豆之實醢食糝食凡祭祀共薦羞之豆
實賓客喪紀亦如之為王及后世子共其內羞王舉則

共醢六十壘以五齊七醢七菹三醢實之賓客之禮共

醢五十壘凡事共醢

非音久菹莊魚反醢吐感反醢乃兮反菁作寧反菹音邠麋京倫反

羸力禾反脾婢支反析星歷反廬音蟀登市軫反拍音搏芹音勤箔音迫荀息尹反食音嗣糝素感反為于偽

反

注疏四豆之實有骨為醢無骨為醢作醢及醢者必先膊乾其肉所謂乾豆也乃後莖之雜以梁麴及鹽漬以美酒塗置甑中百日則成矣壘菹之類肉菜通全物若牒為菹細切為壘凡此不言菹皆是壘鄭

氏曰韭菹以韭為菹詩云獻羔祭韭醢內汁也昌本
昌蒲根切之四寸為菹 王氏曰魯享周公閱有昌
歠 鄭氏曰菁蔓菁也茆鳧葵也羸蜺蜎也脾析牛
百葉也廬蛤也蜃大蛤也蜣蜋子也豚拍脅也或曰
肩也芹楚葵也深蒲始生水 中子 疏曰醢醢與朝
事之豆同 王先生曰臠為饋食籩亦為加籩之實
醢為朝事之豆亦為加豆之實語曰周人以栗其周
人尚栗歠詩曰醢醢以薦其周人之尚醢歠 鄭氏

曰箔箭萌

鄭司農云箔水中魚衣

筍竹萌

䟽曰凡菹醢皆以

氣味相成皆兩兩相配為八豆並后設之 鄭氏曰

醢饗也內則取稻米舉搔漉之小切狼臠膏以與稻

米為饗又曰糝取牛羊豕肉三如一小切之與稻米

稻米二肉一合以為餌煎之 䟽曰此為二豆 鄭

氏曰五齊齊當為醢昌本脾析蜃豚拍深蒲也七醢

醢羸醢蜎魚兔鴈醢七菹韭菁茆葵芹箔筍菹也三

鸕鹿麋麋也醢菹之稱肉及菜並通賓客之禮致饗

餼時也

醯人

醯呼
西反

奄二人女醯二十人奚四十人

疏曰醯人掌醯物故在此 鄭氏曰女醯女之曉醯者

掌共五齊七菹凡醯物以共祭祀之齊菹凡醯醬之物
賓客亦如之王舉則共齊菹醯物六十甕共后及世子
之醬齊菹賓客之禮共醯五十甕凡事共醯

王氏曰醯人有五齊七菹而此又共之者蓋齊菹有須醬而成者有須醯而成者故醯人醯人各有五齊七菹也凡醯物則凡以醯成之之物凡醯醬之物則凡以醯成之之醬也 疏曰王舉共醯六十甕并醯人六十甕即膳夫醬用百有二十甕是也 王氏曰共后及世子之醬齊菹凡醬齊菹用醯以成之者皆共之 疏曰賓客共醯五十甕與醯人五十甕摠為百甕據侯伯舉中言之也上公百二十甕子男八十

癸

鹽人

奄二人女鹽二十人奚四十人

疏曰鹽人掌共百事之鹽所以調和食味故在此

鄭氏曰女鹽女之曉鹽者

掌鹽之政令以共百事之鹽祭祀共其苦鹽散鹽賓客
共其形鹽散鹽王之膳羞共飴鹽后及世子亦如之凡

齊事鬻鹽以待戒令

齊才細反
音煮鹽音古

王氏曰鹽之為物其用博其利厚必有政令以治之
先王之時山有虞澤有衡物為之厲而為守禁至於
鹽則有守禁宜尤嚴以共百事之鹽者鹽之為用非
一若鹽人所掌有祭祀賓客及王后世子膳羞之所
共者是也 劉氏曰鹽之所產不同有刮於地而得
者有風其水而成者有熬其波而出者有汲於井而
為者有積於鹵而結者故刮地之鹽苦而以共祭祀
者取其成於自然與夫玄酒明水不異也熬波之鹽

散取其治洽四海能致遠物故以奉先焉賓客共形
鹽為虎形以共食啗示服猛也又副之散鹽者致遠
物以懷諸侯也飴鹽風其水而成者產於土中其味
甘焉鄭氏曰齊事和五味之事王氏曰鹽於鹽
為古也劉氏曰鹽之陳者其色黑或化而為水也
用火以煉治之則潔白如初而其味和矣

冪人

冪莫
歷反

奄一人女冪十人奚二十人

鄭氏曰以巾覆物曰冪女冪女之曉冪者 䟽曰冪人掌巾冪所以覆飲食之物故次飲食後

掌共巾冪祭祀以䟽布巾冪八尊以畫布巾冪六彝凡

王巾皆黼

黼音甫

鄭氏曰共巾可以覆物也以䟽布者天地之神尚質䟽曰祭天地無灌唯有五齊三酒實於八尊禮器云大路素而越席䟽布冪彼皆據祭天則䟽布祭天地可知 劉氏曰至敬無文以質素為敬也 注䟽

六彝皆盛鬱鬯用以裸宗廟可以文畫者畫其雲氣

與

王氏曰先儒謂畫雲氣非是下文言凡王巾皆黼則畫布巾亦皆畫黼矣

陳氏曰八

尊之中䟽而不畫則畫用精者可知六彝之中畫而

不䟽則䟽之不畫可知 林氏曰八尊所實設而不

酌是禮之文巾以䟽布所以成之以質也六彝所裸

用以鬱鬯是禮之實巾以畫布所以成之以文也布

有䟽則有密巾有畫則有素䟽而素者質也密而畫

者文也 䟽曰其實天地亦有秬鬯之彝宗廟亦有

八尊互見以明義也 劉氏曰凡王之燕射饗食當
巾幕者皆繡為黼則有形為斧矣繡以設色所以示
文章形以為斧所以示威斷古之道也夫巾幕所以
衛潔清而示恭敬也故設官以掌之其所事天地宗
廟君尊之誠可知也

宮人

中士四人下士八人府二人史四人胥八人徒八十人
官制曰宮人居舍官之長漢少府殿中本朝脩內司

疏曰此以下四官是王之寢處供帳安息王身之
事故在此

掌王之六寢之修為其井匱除其不蠲去其惡臭共王
之沐浴凡寢中之事掃除執燭共鑪炭凡勞事四方之
舍事亦如之

匱於建反
蠲古玄反

鄭氏曰六寢者路寢一小寢五玉藻曰君眡朝退適
路寢聽政使人視大夫大夫退然後適小寢釋服是
路寢以治事小寢以時燕息焉春秋書莊公薨於路

寢僖公薨於小寢則人君非一寢明矣 王介甫曰
王朝有三寢有六陰陽之義也 䟽修埽除也 鄭
氏曰井漏井所以受水潦浸瀦謂雷下之地受畜水
而流之者 䟽曰皆所以除其不蠲潔又去其惡臭
之氣 王氏曰潔其寢處也沐以潔其首浴以潔其
身則膚受之塵垢無所受也宮人掌王寢之修則凡
六寢之事必有以兼治之埽除所以致潔執燭所以
為明 鄭氏曰凡勞事凡勞褻之事也舍事為王會

同征伐及巡守所舍之處

掌舍

下士四人府二人史四人徒四十人

鄭氏曰舍行所解止之處 疏曰掌舍掌王舍之事

掌王之會同之舍設桎桓再重設車宮轅門為壇壝宮

棘門為帷宮設旌門無宮則共人門凡舍事則掌之

步

禮反桓戶故反壝
唯季反重直龍反

劉氏曰會同之舍若王巡守則會諸侯於方嶽之下

不巡守則諸侯來會於王城之外設方明之壇以會
同焉亦掌為王宮於其下 疏曰榑桓行馬也內外
兩重設之 王氏曰先設榑桓再重於外然後設車
宮轅門於其內所以營衛至尊也 鄭氏曰設車為
藩則仰兩乘車轅相向以表門也築壇又委壝土起
堦埒以為宮棘門以戟為門 疏曰鄭伐許授兵於
大宮子都與潁考叔爭車子都拔棘以逐之 鄭氏曰
張帷為宮則植旌以表門人門陳列兵衛立長大人

以表門 劉氏曰設桎板再重所以衛宮車也設車
宮轅門所以衛壇壝也為壇壝棘門所以衛天子會
同也為帷宮設旌門以待王之休息也無宮則共
人門所以待王之暫息也 鄭氏曰凡舍事王行所
止舍

幕人

下士一人府二人史二人徒二十人

疏曰幕人掌帷幕等事

掌帷幕幄帟綬之事凡朝覲會同軍旅田役祭祀共其帷幕
幄帟綬大喪共帷幕帟綬三公及諸大夫之喪共其帟
幄烏學反帟音亦綬音受

疏曰帷在旁施之幕於帷上張之幄帷幕之內設之
王所居之帳也帟在上承塵也綬者條也此四物以
綬連繫之王氏曰此正謂王在宮之時則幕入掌
其事焉自朝覲會同以下言共之者共之掌次使張
之不掌其事也鄭氏曰大喪用帷以帷堂也或與

幕張之於庭帟在樞上三公及卿大夫之喪共其帟
唯士無帟王有惠則賜之檀弓曰君於士有賜帟

掌次

下士四人府四人史二人徒八十人

疏曰次次舍也幕人共之掌次張之故連類在此

掌王次之灋以待張事王大旅上帝則張氈案設皇邸
朝日祀五帝則張大次小次設重帟重案合諸侯亦如
之師田則張幕設重帟重案諸侯朝覲會同則張大次

小次師田則張幕設案孤卿有邦事則設幕設案凡喪
王則張帟三重諸侯再重孤卿大夫不重凡祭祀張其
旅幕張尸次射則張耦次掌凡邦之張事

郎當禮反朝
直遙反重直

龍反

鄭氏曰法大小丈尺之差 疏曰王出宮則幕人以
帷與幕送與掌次張之故曰以待張事 王氏曰大
宗伯曰國有故則旅上帝及四望則大旅者以其有
大故會衆神而祭也上帝合五帝言之 陳氏曰禮

器曰一獻之禮不足以大旅大旅具矣不足以饗帝然則大旅之禮不若祀天之為至也 注疏案謂牀

也牀上着氈謂之氈案邸屏風也染色象鳳凰色為

之 劉氏曰此王宿齋所設也 鄭氏曰朝日春分

拜日於東門之外祀五帝於四郊次謂幄也大幄初往所止居也小幄既接祭退俟之處也重帟複帟也重案牀重席也合諸侯於壇王亦以時休息師田不張幄者於是臨誓衆王或回顧瞻察也 疏曰張幕

則有帷可知 劉氏曰諸侯朝覲會同而張大次小
次謂於郊邇方明之壇而為之 鄭氏曰大次亦初
往所止居小次亦待事之處此與諸侯張之也師田
諸侯從王而師田者孤卿有邦事以事從王若以王
命出也不言公公如諸侯禮也喪張帟柩上承塵也
旅衆也公卿以下即位所祭祀之門外以待事為之
張大幕尸則必幄所居更衣處也 王氏曰射人云
王以六耦張三侯皆有次以迓之 鄭氏曰耦俱升

射者次在洗東大射曰遂命三耦取弓矢于次

大府

下大夫二人上士四人下士八人府四人史八人賁十六人胥八人徒八十人

雜說理財之官鄭氏謂大府若漢司農司會若漢尚書鄭氏姑以一官之近似者為之辭以漢攷之外府却是司農內府玉府却是少府外府掌邦布之入出以共百物而待邦之用玉府掌王之金玉玩好竒物

凡良貨賄入焉內府掌九賦九貢九功之貨賄與凡四方之金玉齒革兵器凡良貨賄入焉故凡祭祀賓客會同喪紀軍旅之事外府共之賜予衣服玩好之事玉府內府共之至於大府則兼總內外府凡九貢九賦九功之入悉經大府如財之當入外府與當入玉府者大府皆得搏節之漢時却無大府一官凡天下經賦盡歸之大司農凡山海之賦盡歸之少府到司會又不然鄭氏謂若漢尚書尚書自是少府屬官

當時諸官皆有尚書所以分為四曹如常侍曹主公卿事二千石曹主郡國二千石事民曹主凡吏上書客曹主外國夷狄事光武又分主客曹為南主客曹北主客曹凡六曹鄭氏但以尚書為司會計之職成周司會之職以中大夫為之其品甚隆凡外內府之財皆計於司會獨漢高帝之世蕭何知此領天下文籍財賦以柱下史張蒼為計相蒼既罷遂不復置其後諸府各自置官專管會計如太尉之金曹自主貨

幣鹽鐵事倉曹自主倉穀之類我本朝王府自是今
之奉宸庫內府今之內藏南庫外府今之左藏庫自
渡江後又別置激賞庫今之南庫也周之三府今分
為四凡天下金玉之物皆歸之奉宸山澤鹽鐵之賦
皆歸之內藏以為天子私藏其它泛常所入一歸之
南庫謂之宰相兼制國用至於天下戶口租入則歸
之戶部所以戶部多做不行只緣分散四出權不歸
一所以今日財用漫不可考 周禮菁華大府總凡

貨賄之入而頒之諸府蓋外府職邦布以供邦用內
府受九貢九賦九功之貨賄良兵良器待邦大用若
王及冢宰之好賜予而玉府專其掌掌王珍好之器
物以其王服食好賜而又以司會總其會司書總其
書職內以量入職歲以稽出職幣以振財幣之餘與
夫司裘掌皮皆隸于冢宰所謂制國用者也何者自
大府而下大抵皆出納會稽有司也夫有司不敢與
天子較是非論可否持予奪施舍也是故有所謂好

賜匪頒則共命有所謂芻秣幣帛則共命有所謂服
事羞服則共命有所謂凶喪賓客則共命某服宜賜
不宜賜某事宜舉不宜舉某物宜用不宜用某役宜
興不宜興皆不得與議於其間惟冢宰總百官以道
佐人主上得以約王后世子之過取下得制有司之
擅共凡所以好賜匪頒芻秣幣帛民力之用豈惟慮
患抑以制欲心防微杜漸之意深矣嗚呼茲成周常
有三十年之通而民無凶荒水旱之患至於禮制樂

作兵寢刑措持盈守成之效雖神祇祖考猶安樂之
豈非制國用之所基乎

掌九貢九賦九功之貳以受其貨賄之入頒其貨于受
藏之府頒其賄于受用之府凡官府都鄙之吏及執事
者受財用焉凡頒財以式灋授之關市之賦以待王之
膳服邦中之賦以待賓客四郊之賦以待稍秣家削之
賦以待匪頒邦甸之賦以待工事邦縣之賦以待幣帛
邦都之賦以待祭祀山澤之賦以待喪紀幣餘之賦以

待賜予凡邦國之貢以待弔用凡萬民之貢以充府庫
凡式貢之餘財以共玩好之用凡邦之賦用取具焉歲
終則以貨賄之出入會之

藏才
浪反

疏曰九貢諸侯九貢九賦畿內九賦 鄭氏曰九功

九職也 劉氏曰職以言其任功以言其成 疏曰

大宰掌其正此官掌其副貳者以其物入大府故也

王先生曰受藏之府其內府也受用之府其外府
也內府掌其良貨賄故知其為受藏外府掌其百物

故知其為受用 鄭氏曰此皆藏以給用耳或言受
藏或言受用又雜言貨賄皆互文 疏曰凡王朝三
百六十官及三等采地之吏及為官執掌之事者有
事須用官物皆於大府受財用焉 雜說大府式法
蓋大宰之式法有司遵守而已 王介甫曰角人羽
人掌葛皆徵財物于農以當邦賦之政令則九賦宜
各因其物之所多以便出賦之人關市邦中商旅所
會共王膳服及賓客所須者百物珍異於此乎在故

也夫關市邦中皆商旅所會而獨以關市待王之膳服則凶荒札喪關市無征而王於是時亦不舉而素服也所賦所待宜各從其類故耳 東萊曰關市之賦待王之膳服則膳服雖不會要不出關市之賦而已 李氏曰大府以九賦之財給九式王曰一舉其膳六牲祀兵朝甸其服有九故關市之賦以待王之膳服諸侯來朝卿大夫來聘致之則積饗接之則有饗食燕飲故邦中之賦以待賓客馬牛之食其用芻

禾車采之數皆眡牢禮故四郊之賦以待稍秣功懋
懋賞以馭其幸所受之物邦之大用故冢削之賦以
待匪頒冬官百工取財非一五庫之量母或不良故
邦甸之賦以待工事問勞贈賄酬爵侑食皆有篚實
將其厚意故邦縣之賦以待幣帛大祀小祀事神之
禮牲幣玉器不奢不儉故邦都之賦以待祭祀股肱
或虧君之所痛賻襚含賁闕一不可故山澤之賦以
待喪紀王及冢宰時有所善燕好之用亦以頒恩故

幣餘之賦以待賜予王於諸侯分裁救患凶禮五事
其費則多則邦國之貢以待弔用國家閒暇要在多
積積財之道天下大命故萬民之貢以充府庫難得
之貨飢不可食燕游所用非國之急故式貢之餘財
以共玩好之用凡其一賦之出則給一事之費費之
多少一以式法如是而國安財阜非偶然也 鄭氏
曰膳服則羞服也稍秣則芻秣也謂之稍稍用之物
也喪紀則喪荒也賜予則好用也邦國之貢此九貢

也萬民之貢此九職也式貢餘財謂先給九式及弔
用足府庫而有餘財乃可以共玩好明玩好非治國
之用也 呂氏曰凡式貢之餘財以共玩好之用然
則謂人主竭天下以自奉不為過者其學未嘗出周
官也 王氏曰賦用以賦所入而用之 疏曰此兼
有九貢九功亦取具焉總言賦也貨賄之入謂九貢
九賦等入于大府者貨賄之出大府以之分置於羣
府及給用歲終總會計之

玉府

中士二人下士四人府二人史二人工八人賈八人胥四人徒四十有八人

李氏曰按玉府內府之職掌天子器用財賄燕私之物及受貢獻以備賞賜此帑藏之在宮中者官職最私褻然而為冢宰之屬列太府之下與凡治藏之官不異何也蓋王者無外以天下為家尺地莫非其土一民莫非其子財物之在海內如在囊中況於貢賦

之入何彼此之云哉漢湯沐邑為私奉養不領於經費靈帝西園萬金聚為私藏皆衰亂之俗非先王之法也惟周公皆入於天府則司會之鈎考司書之要貳而廢置誅賞之政行焉如此則用安得不節財安得不聚若以御府禁錢捐之親幸之手省閭之中外人弗睹法制所不行校比所不及則傷財害民非細事也經國書云玉府內府所掌金玉兵器凡良貨賄一也而分為二官何哉蓋玉府所掌皆式貢餘財

之所作及獸人魚人所入之物專共王玩好賜予耳
邦之大用不與焉內府所掌乃九貢九功之貨賄及
諸侯所獻國珍皆公家之用以供邦之大用故不可
不分為二也 注疏此官掌王之金玉玩好兵器凡
良貨賄之藏以玉為主故云玉府有工者以其使攻
玉故也有賈者使辨玉之善惡貴賤故也

掌王之金玉玩好兵器凡良貨賄之藏共王之服玉佩
玉珠玉王齊則共食玉大喪共含玉復衣裳角枕角柩

掌王之燕衣服衽席牀第凡褻器若合諸侯則共珠槃
玉敦凡王之獻金玉兵器文織良貨賄之物受而藏之
凡王之好賜共其貨賄

好呼報反藏才浪反舍戶暗反
枕之鳩反衽而甚反第側美反

敦音對
織音志

鄭氏曰良善也凡此皆式貢之餘財 劉氏曰服玉

凡王所服用之玉也 鄭氏曰佩玉王所帶者佩玉

上有葱衡下有雙璜衡牙纈珠以納其間 雜說古

之君子必佩玉其色有白黑蒼之辨其聲有角徵宮

羽之應其象有仁智禮樂道德忠信之備或結或垂
所以著屈伸之理或設或否所以適文質之儀此所
以純固之德不內雜非僻之心無外入也 劉氏曰
孔子曰君子於玉比德焉故左右進退然後玉鏘鳴
也是以君子無故玉不去身也珠玉則琢玉為珠以
貫冕弁 王氏曰齊者必精明之至然後可以交神
明玉為純陽之精可以助精明之養也故共食玉
䟽曰含玉以為口寶 鄭氏曰角枕以枕尸鄭司農

云復招鳧衣裳用生時服角柶角匕也以楔

先結反齒

士喪禮曰楔齒用角柶楔齒者令可飯含 王氏曰

燕衣服王燕私所服 疏曰衽卧席也 王氏曰席

坐席也床第床簀也褻器私褻所用之器 疏曰合

諸侯謂殺牲歃血而盟者 鄭氏曰敦亦槃屬珠玉

以為飾以槃盛血以敦盛食合諸侯者必割牛耳取

其血歃之以盟珠槃以盛牛耳尸盟者執之 疏曰

凡王之獻擬王獻遺賓客之物 王氏曰金玉兵器

文織與凡良貨賄皆物之美而可以為獻者文織即書所謂厥篚織文同帛之有文出於織而成之者也玉府受於作治之工而藏之以待用焉好賜王所恩好而賜之

內府

中士二人府一人史二人徒十人

鄭氏曰內府主良貨賄藏在內者 王先生曰此以待邦之大用 經國書云內府外府雖以內外為名

然內府供邦之大用外府反供王及后世子衣服之用互相稽察漢以少府掌天子私藏而大農掌國家經費職分既分官府亦異侈心生矣

掌受九貢九賦九功之貨賄良兵良器以待邦之大用凡四方之幣獻之金玉齒革兵器凡良貨賄入焉凡適四方使者共其所受之物而奉之凡王及冢宰之好賜予則共之

使所
吏反

疏曰掌受九貢九賦九功者此由大府而來內府受

而藏之所謂受藏之府也 王氏曰良兵若兇之戈
和之弓垂之竹矢良器若赤刀弘璧琬琰之屬已上
非國之經用並以待邦之大用大故非常所用也四
方賓客合幣以獻王則謂之幣獻謂諸侯來朝所獻
國珍若太宰云玉幣玉獻是以其物入於內府則王
者非以此為己私利特以待邦之大用矣 疏曰金
若惟金三品玉若璆琳琅玕齒若象齒革若犀皮之
類 王氏曰王遣使者於四方諸侯則供其所受之

物而奉之此王所以遺諸侯者也四方之幣獻既入於內府而王所以遺諸侯者亦在焉此施報之禮也
疏曰冢宰貳王治事或有所善亦得賜予之東萊曰推此則古人相權可知矣 雜說玉府共王之好賜而此共王及冢宰之好賜則此又不若玉府之為天子私用也

外府

中士二人府一人史二人徒十人

鄭氏曰外府主泉藏在外者 王先生曰此官待邦之小用 劉氏曰外府所謂受用之府

掌邦布之入出以共百物而待邦之用凡有灋者共王及后世子之衣服之用凡祭祀賓客喪紀會同軍旅共其財用之幣齎賜予之財用凡邦之小用皆受焉歲終則會唯王及后之服不會

齎或為資音咨

王氏曰古者寶龜而貨貝所以交易者唯貝而已至太公立九府圜法而始用錢代貝或曰泉或曰布布

取宣布之意泉取流行之意其實則一而已入入於外府出出以給用也 劉氏曰以共百物者給邦布致之以周國用故曰以待邦用 王氏曰待邦之用凡有法者皆經用也非經用則有所不給 王介甫曰共王及后世子者外府所待邦用皆有法欲王及后世子非法弗服故也 王氏曰幣禮幣也 鄭氏曰齎財也 王氏曰王府內府所共者貨賄之賜予外府所共者邦布之賜予也凡邦之小用皆受焉邦

布可以權百物而通之故小用皆取給於此 劉氏
曰唯王及后之服不會雖世子猶會之欲其不踰於
矩度而衣服有常故也

司會

古外反

中大夫二人下大夫四人上士八人中士十有六人府
四人史八人胥五人徒五十人

鄭氏曰會大計也司會主天下之大計計官之長

疏曰此官主考治又考財故連類在此 雜說夫理

財之職凡府藏之事大府下大夫為之長至會計又自立一項司會為之長其屬職內掌邦賦之入職歲掌邦賦之出司書掌簿書職幣掌收奇羨此等合屬大府而今也皆司會主之用中大夫二人其權勢足以檢括使不得為姦利則是大府至外府只為朝廷管許多財賦而會計支用皆不與焉先王措意甚遠自後世看來疑若利權散出漫不可考所以設官皆并合之凡會計之事皆司農之屬官如唐置三司使

凡山澤之利盡歸於鹽鐵使凡財賦之入盡歸於戶部而度支則會計之故三司只設副使而三司使為之長雖說別設官而相稽考然已是三司使之屬已

非先王之意

議論具見大府

掌邦之六典八灋八則之貳以逆邦國都鄙官府之治以九貢之灋致邦國之財用以九賦之灋令田野之財用以九功之灋令民職之財用以九式之灋均節邦之財用掌國之官府郊野縣都之百物財用凡在書契版

圖者之貳以逆羣吏之治而聽其會計以參互攷日成以月要攷月成以歲會攷歲成以周知四國之治以詔王及冢宰廢置

劉氏曰司會職財計者也而必先掌六典八灋八則之貳以逆邦國都鄙官府之治者聖人以謂職會計以進身者不顧國政之是非不度民情之弊疾惟利是積則或傷為仁惟節是求則或害於義故禮樂衰微黎民困弱則非所以存國之體也於是擇中大夫

之賢取其道德猷為亞於冢宰而才於列卿者以司會計是故必知六典八法八則之本然後施九貢九賦九功九式之法知其治之本而不失之則財用可致而不害乎王之所以皇建其極於天下者矣故冢宰施其法於上者也司會察其法於下者也則有傷于國有蠹于民蓋得以卷舒裁成王道焉然後參互以考日成以月要攷月成以歲會攷歲成防吏之奸欺非以戕吾民也不明乎是者則務刻削於民國利

雖羸而下增弊疾蠹於王體非所以建大中也以周知四國之治者謂八州諸侯之國禮樂刑政能致中和於其民者必周知之則歲會雖不足而其治有可旌者焉歲會雖羸而其治有可廢者焉故以詔王及冢宰廢置者以治為本也其財用之姦弊則其下吏當之於乎盛哉其制治之方也財足以周天下之用而治不失其本焉楊氏曰太宰以道揆事王其制國用也雖共王之用如羞服匪頒好用之類皆得以

式均節之小宰而下有法守不得而預焉故太宰之職以九式均節財用而不言邦用蓋通言財用則邦用在其中矣邦用如祭祀賓客喪荒之類是也小宰執九貢九賦九式之貳以均節邦用司會以九式之法均節邦之財用者蓋小宰貳太宰者也故量貢賦之入均之應九式之用則與太宰同而所節者則邦之用而已所共王者不得而與焉故均節邦之財用而已與小宰之均節亦異也 注疏書謂簿書要其

最凡也版戶籍也圖土地形象田地廣狹下文司書掌其正此司會主鉤考故掌其貳以參互攷日成者以司書之等相參交互攷一日之成一日之成計算文書也以月要攷月成月計曰要以攷一月之成事也以歲會攷歲成者歲計曰會以攷一歲之成事也此所謂羣吏以會計文書送於司會者司會皆得斷之上文云以逆群吏之治而聽其會計者也 雜說王制曰司會以歲之成質於天子冢宰齊戒受質

司書

上士二人中士四人府二人史四人徒八人

鄭氏曰司書主會計之簿書

掌邦之六典八灋八則九職九正九事邦中之版土地之圖以周知入出百物以叙其財受其幣使入于職幣凡上之用財用必攷于司會三歲則大計羣吏之治以知民之財器械之數以知田野夫家六畜之數以知山林川澤之數以逆群吏之徵令凡稅斂掌事者受灋焉

及事成則入要貳焉凡邦治政焉

正音征械戶戒反畜
許又反斂力驗反

王先生曰自六典至九事皆謂掌其書也 鄭氏曰

九正九貢九賦也九事九式也變言之者重其職明

本而掌之非徒相副貳也 林氏曰司書目九貢九

賦為九正而書稱文王以庶邦惟正之供蓋古之王

者必正經賦以足經用而未見有無名橫斂焉 劉

氏曰九式亦曰九事者九式所用以集邦之九事也

王氏曰邦中之版則邑都之內籍民數之版 疏

曰土地之圖即司會之所謂圖也自此以上所掌與
司會同者以其司會主鉤考司書掌書記之司書所
記司會鉤考之故二官所掌其事通焉叙比次也比
次其財知用多少云受其幣者百官所用之餘財送
來與司書司書受之頒入職幣之官 王氏曰王者
享四海之富備百物之奉斂散予奪一制於己其用
財也雖不可以有司法數拘然亦不可不為計其多
寡所以防有司之姦偽也司會正掌會計之官以九

式均節邦之財用則凡財用多寡之數必皆備於司會故從而攷之也歲會攷歲成每歲固有會至於三歲又通而計焉其事為最詳故謂之大計太宰於三歲大計羣吏之治而誅賞之司書正掌會計之書以此贊成大宰之事而已攷其所治民財器械之數孰備孰乏田野夫家六畜山林川澤之數孰登孰耗孰治孰廢鄭氏曰山童澤枯則不稅疏曰逆鉤考之恐羣吏濫徵斂百姓故知本數乃鉤考其徵令也

李氏曰夫虧下以益上貪功以求賞不恤人之困乏
皇皇以言利為先者吏之常態也是故為之鉤考雖
器械六畜山林川澤必知其數如此吏於民不敢厚
斂矣 疏曰凡稅斂之掌事者若地官閭師旅師等
皆來司書處受法焉法應當稅之數也 王氏曰司
書掌九職九正九事則稅斂之事有法存焉及事成
收斂畢又入要貳焉物數之要要書之貳必入於司
書則知稅斂之多寡故也司書自六典八法已下無

不掌其書是以凡邦之治皆於此乎攷焉

職內

上士二人中士四人府四人史四人徒二十人

雜說職內主會計邦賦之入

掌邦之賦入辨其財用之物而執其總以貳官府都鄙之財入之數以逆邦國之賦用凡受財者受其貳令而書之及會以逆職歲與官府財用之出而叙其財以待邦之移用

鄭氏曰賦是九賦九貢等總名下言賦者皆此類也
辨其財用之物凡所稅入者種類不同須分別之又
執其稅總要簿書也官府財入若關市之屬都鄙財
入三等采地之稅皆受取一通副貳文書於職內既
知財入之數故能鉤考用賦多少知其得失也凡受
財者若官府合用官物受財於職內者並副寫一通
勅令文書與職內於是職內依數令付之書之者若
言某月某日詔書出某物若干給某官某事 王氏

曰及歲終而會則以此逆職歲所用及官府等所用
參互稽攷也 鄭氏曰而叙其財謂鈎考今藏中見
有為之簿書移用轉運給它 王氏曰移此之有餘
以補彼之不足

職歲

上士四人中士八人府四人史八人徒二十人

雜說職歲主會計邦賦之出

掌邦之賦出以貳官府都鄙之財出賜之數以待會計

而攷之凡官府都鄙羣吏之出財用受式灋于職歲凡上之賜予以叙與職幣授之及會以式灋贊逆會

王氏曰凡官府都鄙之財或出以給用或用以賜予皆有數以貳之其所貳財數之書則以備歲終會計而攷之故也蓋有數以計其財有書以貳其數則財用之多寡費出之當否可考而知矣鄭氏曰凡百官之公用其式法有多少王氏曰必受之於職歲者不得妄出也此與大府凡頒財以式法授之相為

先後也幣餘之賦以待賜予職幣掌幣餘故賜予則

以叙予之使授之叙先後之倫

鄭氏曰叙受賜者之尊卑

鄭氏

曰贊逆會助司會鉤考羣吏之計

王氏曰其始以

式法受之歲終以式法逆之則財數之多寡費用之
當否皆以式法治正之矣 劉氏曰貨賄之入非職
內之令則不受焉其出也非職歲之令不授焉

職幣

上士二人中士四人府二人史四人賈四人胥二人徒

二十人

王氏曰職幣掌餘財 鄭氏曰幣給公用之餘

掌式灋以斂官府都鄙與凡用邦財者之幣振掌事者

之餘財皆辨其物而奠其錄以書揭之以詔上之小用

賜予歲終則會其出凡邦之會事以式灋贊之

奠音定
揭其列

反

劉氏曰職幣雖給餘財亦有式法焉凡餘財皆謂之
幣此掌斂而聚之振者興起之謂也掌事者所用有

餘財既不復用則沈墜矣故振興之以適於他用則無滯財矣 疏曰辨其物者知其色類及善惡 鄭氏曰奠定也定其錄籍 王氏曰辨其物防其或以賤貿貴也奠其錄防其或以多為寡也 劉氏曰既定其數而錄之于籍矣又書其目而標揭其物焉然後度其用之所宜以詔王之王小用賜予焉若大事賜予則非此餘財所能共也 王氏曰雖幣餘不廢會者凡以謹其用而防之凡邦之會事以式法贊之以

贊司會故也與職歲以式法贊逆會同意 黃氏曰
周公設官理財者居其半財用之數驗之以書契督
之以要成證之以貳令考之以參互制之以式灋辨
之有類執之有總小數之則乘大數之則會職歲所
叙職幣所振雖餘財而加肅焉

司裘

中士二人下士四人府二人史四人徒四十人

東萊曰司裘主王裘服

掌為大裘以共王祀天之服中秋獻良裘王乃行羽物
季秋獻功裘以待頒賜王大射則共虎侯熊侯豹侯設
其鵠諸侯則共熊侯豹侯卿大夫則共麋侯皆設其鵠
大喪獻裘飾皮車凡邦之皮事掌之歲終則會唯王之
裘與其皮不會

中音仲鵠古毒
反廐許金反

注疏大裘黑羔裘服以祀天示質也中秋獻良裘者
中秋鳥獸毛毼因其良時而行之良裘王所服也為
八月誓獮田所用也 劉氏曰其皮毛至良預獻于

王以備凝沍也 注疏羽物小鳥鷦鷯之屬鷹所擊

者中秋鳩化為鷹中春鷹化為鳩順其始殺與其將止而大頒羽物故羅氏仲春亦云行羽物行賜也以羽鳥之物賜羣臣以應秋氣也季秋是九月授衣之節功裘卿大夫所服故獻之以待頒賜也 王氏曰功裘人功多質不如良裘其成故緩故季秋始獻之 鄭氏曰王大射者為祭祀射王將有郊廟之事以射擇諸侯及羣臣與邦國所貢之士可以與祭者射

者可以觀德行其容體比於禮其節比於樂而多中者得與於祭虎侯王所自射也熊侯諸侯所射豹侯卿大夫以下所射此王之大射也諸侯謂三公及王子弟封於畿內者卿大夫亦皆有采地焉其將祀其先祖亦與羣臣射而擇之諸侯之大射熊侯諸侯所自射豹侯其群臣所射卿大夫之大射麋侯君臣共射焉士不大射士無臣祭無所擇凡大射各於射宮侯者其所射也以虎熊豹麋之皮飾其側又方制之

以為準著于侯中謂之鵠所謂皮侯也必用虎豹熊麋之皮示服猛也所射正謂之侯者天子中之則服諸侯諸侯以下中之則得為諸侯凡此侯道虎九十弓熊七十弓豹麋五十弓列國諸侯之大射大侯亦九十糝七十豻五十遠尊得伸可同耳

疏曰大侯熊侯也糝侯者

糝雜也豹鵠而麋飾豻侯者豻鵠豻飾也云遠尊得伸者與畿內諸侯異也

侯中之大小

取數於侯道鄉射記曰弓二寸以為侯中則九十弓者侯中廣丈八七十弓侯中廣丈四五十弓侯中廣

一丈尊卑異等此數明矣考工記曰梓人為侯廣與崇方三分其廣而鵠居一焉然則侯中丈八者鵠方六尺侯中丈四者鵠方四尺六寸大半寸侯中一丈者鵠方三尺三寸少半寸謂之鵠者取名于鵠鵠鵠鵠小鳥而難中是以中之為雋也 王氏曰馭民之道以正物為事正物則服猛毅為先能致猛毅者莫大於虎而豹與熊次之能服猛毅者莫大於王而諸侯次之由是而得萬國之懽心以事其先王者天子

之德也故共虎侯熊侯豹侯由是以得百姓之懽心
以事其先君者諸侯之德也故共熊侯豹侯至於卿
大夫之德則以養人為事養人以除害為先春秋書
多麋以其為稼之害則卿大夫之射麋侯者以除害
故也故大射則共麋侯侯之為言捍外受內以為蔽
障諸侯之象也 陳氏曰王有三射大射司裘所言
是也賓射射人所言是也燕射鄉射記所言是也天
子諸侯與其臣大射賓射皆異侯而燕射與其臣同

侯異侯所以辨其等同侯所以一其懼也 鄭司農

云廡裘陳裘也

疏曰廡興也若詩之興象生時而作之凡為神之偶衣物必沽而小耳此

後鄭之言也周禮一部內言廡者多故書皆為淫先鄭皆為陳後鄭皆攷之從興謂象似而作之所謂明

器也此後並同

王氏曰廡裘與廡樂同意蓋陳儀物於庭

序也夫儀物皆德之所寓盛德在人有人不忘者存

疏曰皮車以革鞅遣車

掌皮

下士四人府二人史四人徒四十人

掌秋斂皮冬斂革春獻之遂以式灋頒皮革于百工共

其毳毛為氊以待邦事歲終則會其財齎

或為資毳尺銳反

呂氏曰全毛者謂之皮去其毛者謂之革 疏曰鳥

獸毛毳之時其皮善故秋斂之革須練治用功深故

冬斂之 鄭氏曰皮革逾歲乾久乃可獻故春獻之

獻其良者于王以入司裘給王用式法作物所用多

少故事 疏曰百工即冬官裘氏韋氏鮑人之類

鄭氏曰毳毛毛細縹者以為氊當用則共之 王氏

曰邦事若大旅張氊案之屬鄭氏巾車注齎即財也
內宰

下大夫二人上士四人中士八人府四人史八人胥八
人徒八十人

注䟽內宰后宮官之長以其治婦人之事故曰內宰
王先生曰王有太宰而后謂之內宰王有司服而
后謂之內司服王有小臣而后謂之內小臣可見后
之不預外政 太平經國書曰天子理陽道后治陰

德風化並行故贊治之官皆曰宰內宰屬太宰者意其治家之道亦多權衡審訂於大臣大臣格心之所自出歟今攷內宰下大夫二人命士十二人自內小臣奄官凡將命洒掃之人自九嬪至女內史凡內官自典婦功織紵衣服凡掌內之事皆屬焉而隸於太宰蓋女寵近習所以移人主之德者大臣總之無敢踰節皇父作相膳夫內史皆不得人巷伯之雅寺人為之雖奄官亦遴其選晉侯近女而惑疾醫和以為

趙孟之過古人致君二南之化其道由此東周宰職
不競春秋首書宰咺貶妄甚者三公逆后其何以正
王閫乎漢大長秋為后卿蓋內宰之意自中宮僕謁
尚書黃門冗從如小臣之屬自內府令如內司服之
屬猶領焉至於從帝入宮贊道內事若中常侍與凡
侍內掖庭暴室御府祠祝之輩與夫勾盾中藏府令
丞典掌貴人采女官婢侍使服食游觀諸事皆少府
統焉職分既分不相干涉漢初大長秋中常侍參用

士人鄧通雖為文帝倖人猶聽丞相檄召欲斬之自
東京悉用宦者士大夫既無復與聞而隸少府者徒
以文屬太尉楊秉糾中常侍而尚書詰以三公統外
越分奏近臣蓋三府之令不行於便嬖况后妃乎然
前漢置大長秋以掌後宮者士大夫也猶可以節制
後宮成帝勅許后減省用度許后上書辨論且恐官
吏以詔書繩之猶有周家氣象後漢遂改以宦官然
宮中財用尚付之有司章和以後盡用宦者總領自

此不領於外朝及隋置殿中監唐置內諸司使凡王服食器用一切付之奄人之手大臣不敢問則成周設官之意無復存者

掌書版圖之灋以治王內之政令均其稍食分其人民以居之以陰禮教六宮以陰禮教九嬪以婦職之灋教九御使各有屬以作二事正其服禁其奇袞展其功緒

奇紀宜反
袞似嗟反

劉氏曰內宰所掌六宮之陰禮九御之婦職王內之

政令閤寺之法禁皆其所以為書也宮內百職之名
氏皆載於其版宮寢內外之廬寺皆畫於其圖王
氏曰王內后宮也鄭氏曰政令施於閤寺者雜
說分其人民以居之不知後宮如何容人民在內殊
不知只看目錄更無可疑天官一屬應于外朝盡用
士人為之至醢醢酒漿之屬却用奄人女奚內宰而
下內小臣寺人內豎至女史皆奄奚為之至於典婦
功典絲典泉染人屨人苟外有司可為之者依舊是

士人為之而內司服與縫人又非奄人不可所謂分
其人民只在許多奄人女奚女御在宮閭之執事者
耳 王氏曰易曰男正位乎外女正位乎內王立六
宮以待天下之外治所以正男位也后立六宮以待
天下之內治所以正女位也男女天地之大義也

鄭氏曰陰禮婦人之禮六宮謂后也不敢斥言若今
稱為中宮婦人稱寢曰宮后象王立六寢而居之亦
正寢一燕寢五 劉氏曰六宮之主王后也后雖尊

而四德具備不敢怠於聽學者日新其德以為六宮之範也故詩稱尊敬師傅言告言歸者以為后妃之美周公所以擇下大夫之賢者以為內宰而教王后者此書其實也大雅云思齊大任文王之母思媚周姜京室之婦大姒嗣徽音其來遠矣鄭氏曰教九嬪不言夫人世婦者舉中省文也九御女御也九九而御因以號焉九九為屬同時御又同事也劉氏曰女御位卑職勞故以執婦人之職為教之先焉使

自有屬者自夫人下至女御三三為屬如姪娣之於
媵以相親愛俾無妬忌之心而關雎樛木之化成矣
鄭氏曰二事絲枲之事 王氏曰太宰以絲枲之
事任嬪婦內宰以絲枲之事任內人在內者勤於絲
之事則天下無不蠶之人矣勤於枲之事則天下無
不績者矣治自內而外化自近而遠之意正其服非
法不服也不敢過為侈靡矣 劉氏曰奇衮謂越常
道以立異用秘計以求媚者 王氏曰展省之也省

其絲枲之功緒也絲枲女功之本必勤於化治然後
可以成布帛固不可以斯須廢也 張南軒曰古者

雖后妃之貴亦必置師傅以教詔之葛覃言歸必首
以告師氏而左氏傳亦謂傳母不在宵不下堂則知
師傅之職所以朝夕教道之者也法家拂士非惟人
主不可一日無在后妃亦然誠以人心易動貴驕易
溺處其極而無所畏憚則其可憂將有不可勝言者
是以古之明王與其后妃相與警戒而不可少忽乎

此也嘗攷周家建國自后稷以農事為務歷世相傳其君子則重稼穡之事其室家則躬織紝之勤相與咨嗟嘆息服習乎艱難詠歌其勞苦此實王業之根本也如周公之告成王其見於詩有若七月皆言農桑之候也其見於書有若無逸則欲其知稼穡之艱難知小人之依也吾以為帝王所傳心法之要端在乎此夫治常生於敬畏而亂常起於驕肆使為國者每念乎稼穡之勞而其后妃又不忘乎織紝之事則

心不存焉者寡矣何者其必嚴恭朝夕而不敢怠也
必懷保小民而不敢康也其畏天下之飢寒若己飢
寒之也是心常存則驕矜放肆何自而生豈非治之
所由興也歟美哉周之家法也聖哲相繼固不待論
而其后妃之賢見於簡編太王妃則姜女也文王母
則太任也文王妃則太姒也武王妃則邑姜也皆助
其君子焦勞于內以成風化之美觀后妃則太王丈
武之德可知矣以此垂世而其後世猶有幽王者惑

褒姒而廢正后以召犬戎之禍而詩人刺之曰婦無
公事休其蠶織蓋推其禍端良由稼穡織紵之事不
聞於耳不動於心以至於此故誦葛覃服之無數之
章則知周之所以興誦休其蠶織之章則知周之所
以衰其得失所自豈不較然乎以是意而攷秦漢以
下其治亂成敗之源皆可以得而見之矣

大祭祀后裸獻則贊瑤爵亦如之正后之服位而詔其
禮樂之儀贊九嬪之禮事凡賓客之裸獻瑤爵皆贊致

后之賓客之禮凡喪事佐后使治外內命婦正其服位
注䟽大祀祭祀宗廟也王既裸而出迎牲后乃從後
裸也祭統曰君執圭瓚裸尸大宗執璋瓚亞裸此大
宗謂夫人不與而攝耳獻謂王薦腥薦熟后亦從後
獻也以玉爵酌醴齊盞齊亞王獻尸瑤爵謂尸卒食
王既醕尸后亞獻之其爵以瑤為飾此三事內宰皆
佐后也 劉氏曰正其服若祭先王以禕衣祭先公
以綏狄之類 鄭氏曰位房中戶內及阼階所立處

也禮樂之儀薦徹之禮當與樂相應也天子之禮薦時歌清廟徹歌雍內宰詔之俾無失節也九嬪贊后薦玉盥薦徹豆籩內宰又助九嬪贊后之事也賓客王同姓及二王之後來朝覲為賓客者裸之禮亞王而禮賓獻謂王饗燕亞王而獻賓也瑤爵所以亞王酬賓也坊記曰陽侯殺穆侯而竊其夫人是以大饗廢夫人之禮 劉氏曰致后之賓客之禮若牢禮及醫醢醢之類祭祀賓客后皆與詩稱參差行菜左右

芼之窈窕淑女鐘鼓樂之是也 鄭氏曰內命婦

九嬪世婦女御外命婦卿大夫士之妻王命其夫后
命其婦也使使其屬之上士 疏曰服有精麤位有
先後

凡建國佐后立市設其次置其叙正其肆陳其貨賄出
其度量淳制祭之以陰禮中春詔后帥外內命婦始蠶
于北郊以為祭服歲終則會內人之稍食稽其功事佐
后而受獻功者比其大小與其麤良而賞罰之會內宮

之財用正歲均其稍食施其功事憲禁令于王之北宮而糾其守上春詔王后帥六宮之人而生種稌之種而獻之于王

淳諸允反中音仲種直龍反本或作重稌音六種章勇反

鄭氏曰市朝者君之所以建國也建國者必面朝後市王立朝而后立市陰陽相成之義雜說内外之治王與后分掌天子理陽道后治陰德令建國之初面朝後市市陰而朝陽內宰佐后止於建國之初非常與於市事王介甫曰次司市所謂思次介次叙

所謂各於其地之叙肆所謂各掌其肆之政令

疏曰陳其貨賄陳列之也 劉氏曰度五度分寸

引丈尺量五量龠合升斗斛淳布帛之廣制布帛之長皆出於市所以一制度正民心絕情偽也

注疏陰禮婦人之祭禮於市中祭之蠶于北郊婦人以純陰為尊郊必有公桑蠶室焉祭義曰蠶事既畢遂朱綠之玄黃之以為祭服 王介甫曰內

人王內之人也 注疏稽計也計絲枲女功之事

以知多少也典婦功曰及秋獻功女御等獻絲枲之功也布帛等纓小者則細長纓大者則麤惡賞罰之以示懲勸也內宮是總六宮之內所有財用皆會之劉氏曰賞罰於歲終故均其稍食於歲始勵功德也已施其功事於正歲則稽其功事於歲終考勤怠也疏曰憲表縣之北宮者對王六寢在南后六宮在北也守宿衛者上春亦謂正歲以其春事將興故云上鄭氏曰六宮之人夫人已

下分居后之六宮者每宮九嬪一人世婦三人女御九人其餘九嬪三人世婦九人女御二十七人從后唯其所燕息焉從后者五日而沐浴其次又止十五日而徧云夫人如三公從容論婦禮古者使后宮藏種以其有傳類蕃孳之祥必生而獻之示使育之使不傷敗且以佐王耕事供禘郊也先種後熟曰種後種先熟曰稊詩云黍稷種稊是也王當以耕于藉田李氏曰內宰仲春詔后帥命婦蠶以為祭服又上

春詔后帥六宮生種稷之種而獻于王夫普天之下
蠶者非一女也將以為祭服有不足者乎而后且親
蠶耕者非一男也將以為梁盛有不足者乎而后且
佐王之耕以事先舅先姑敢不用力焉不可以為婦
道也王后之尊而親蠶天下之女子有不遵微行求
柔桑者乎王后之尊而佐耕天下之女子有不饁南
畝喜田畯者乎王后之尊而為婦道天下之女子有
不承先祖以共祭祀者乎明王以孝治天下此其一

助也

內小臣

奄上士四人史四人徒八人

鄭氏曰奄稱士者異其賢東萊曰奄之位止於上士先王慮患之意蓋微李氏曰周禮一部內其餘奄皆不命也夫宦官之位天象所有指其居次則或在帷薄之內論其職掌則或聞牀第之言固不可以訕辱俊乂渾肴男女其用奄人是乃制事之宜矣然

而先王不以恩奪義不以私廢公雖其褻臣無得過
寵奄稱士者止於四人況可為卿大夫乎哉 雜說
內小臣奄上士四人必是奄受上士之爵其它未有
以爵稱者度得此意必是當時雖褻近必擇一謹信
端厚可受爵者為之以掌王后命令而正其服位非
如後世所謂著青紫者千人也夫后之尊亞於王一
等耳掌其命者四人而已三代禮樂號周為備而六
寢六宮之奄寺人內豎其衆不過二十人不有定制

其能如是哉 經國書云儒者多疑先王之世猶用

奄人殊不知此皆領於冢宰無可慮也漢少府得管

攝宮中奄官而少府屬於丞相御史此制猶好

漢志少府

中黃門屬焉注中黃門謂奄人居禁中在黃門內給事者

自光武以山海鹽鐵歸

之郡縣是宮中私用盡付與外有司章和以後宮中

不堪於是別自立監都用奄人領之自是奄人不領

於外朝至隋煬帝置殿中監專以奄人掌之凡王后

服食器用盡付之奄人之手大臣都誰何不得永

嘉陳氏曰西漢去周末遠也政事規模粗得古意夫極治之世無它人主親近端人正士不使小人在側而已是以成周盛時內小臣閹人寺人之屬悉統於冢宰蓋閹寺之徒朝夕左右最易褻近人主亦易得而寵任之今既屬之冢宰則人主不得以私意昵內臣不得以非道干故侍御僕從固非正人此先王治內之嚴也西漢之制猶稍近古三公總九卿而少府之官凡王之內臣皆屬焉蓋九卿之長也佞倖如鄧

通其官止於上大夫寵任則無薦達一有細過申屠
得以伸召斬之威此時宰相其權最重自武帝疎遠
朝士宰相不得加官入內其權稍輕矣既而石顯用
事匡衡甄譚猶得條奏具言舊惡則宰相雖無曩時
之權而宰制之意猶故也況當時內臣亦參選明經
之士咸拜議郎更宿王宮以備顧問如揚雄之位執
戟孔安國之掌御唾壺是也東漢則不然議郎不在
宿直故人主無由親近明經之士中常侍不復雜調

他官盡是宦者為之故人主日密邇小臣卒至宦者
用事廟堂機務朝臣不得參訂王爵天憲往往皆專
閨閹孫程曹騰始得以專廢立之權董卓終得以成
敗國之謀君子因其末勢之恣橫而原其初之所自
蓋東漢三公擁虛無復西漢統領九卿之職而宦者
之專權非三公之所能制之故也博議 雜說成周凡
內臣閹寺皆屬之冢宰漢興內外之官皆屬丞相故
鄧通無禮申屠嘉得以召斬之惟文帝能伸其威必

待困辱而後召之而小臣自此不敢妄為矣自景帝
以貴幸用事丞相之議屈於晁錯大臣之言始輕是
後九卿更進用事而石慶不能與議嘗欲治近臣所
忠九卿減宣罪反受其過大臣見輕可知矣其極至
於孔光為相不答省中語而養成王氏之禍也 雜
說成周建官內外不分內臣皆冢宰所掌漢以鄧通
韓嫣為上大夫上大夫乃外朝之官而鄧韓寵幸在
內之臣亦得為之亦見漢時內外無所隔絕僅得成

周遺意王嘉為東平王訟寃而表石顯之不當侯而
嘉反下獄死此漢之所以衰也

掌王后之命正其服位后出入則前驅若有祭祀賓客
喪紀則擯詔后之禮事相九嬪之禮事正內人之禮事
徹后之俎后有好事于四方則使往有好令于卿大夫

則亦如之掌王之陰事陰令

相息亮反
好呼報反

注疏太僕云掌正王之服位出入王之大命小臣侍
后猶太僕侍王命謂使令所為也或言王后或言后

通耳前驅道之也擯贊詔告也相助也正直正之而已
劉氏曰禮事一也擯相正隨其人之尊卑也
王氏曰膳夫徹王之胾俎所以尊王也內小臣徹后
之俎所以尊后也 劉氏曰王后族親之在外內者
必遣內小臣以修其問遺之好所以睦外親也陰事
陰令婦人之事及令之者也

閹人

閹音昏

王宮每門四人圍游亦如之

鄭氏曰閹人司晨昏以啓閉者刑人墨者使守門游離宮也園御苑也 疏曰此言每門則王宮五門皆有閹四人守之若園游之門人同名閹人而職別者也 徂徠原亂曰周禮閹者掌守王宮中門之禁而已寺人掌王宮之內人及女官之戒命而已漢武帝數宴後庭潛游離館奏請機事多以宦官主之宦官始預政焉則宦官之權武帝啓之也宦官之權啓則巧倖進而正人廢矣諛佞入而君政敗矣吁亂是以生

雜說內小臣雖專出后之命令以風化天下然閹寺繼之命令不得苟出

掌守王宮之中門之禁喪服凶器不入宮潛服賊器不入宮奇服怪民不入宮凡內人公器賓客無帥則幾其出入以時啓閉凡外內命夫命婦出入則為之闢掌掃門庭大祭祀喪紀之事設門燎蹕宮門廟門凡賓客亦如之

帥色類反闢亦作辟婢亦反掃素報反燎力召反

注中門雉門也王有五門外曰臯門二曰庫門三曰

雉門四曰應門五曰路門雉門以內外為中也劉氏曰推此則其外皋門雉門可知也王介甫曰孔子見齊哀者雖少必作過之必趨內有感惻則外為之感動喪服凶器不入宮則不欲變動至尊故也

鄭氏曰喪服衰經也凶器明器也王介甫曰潛服則衰甲之類賊器器之可以賊人者不入宮所以嚴禁衛也奇服非法服也怪民行怪者也不入宮則王宜非禮勿視非義勿聽也王氏曰內人王內之臣

公器公家之器賓客諸侯諸臣之為賓客者皆有帥
以道其出入若無帥則闔人察之 鄭氏曰三者之
出皆須使者符節乃行 王氏曰以時啓閉晨昏為
啓閉之節也 注疏內命夫卿大夫士之在宮中者
外命夫卿士大夫在朝者外命婦總卿大夫之妻也
內命婦三夫人以下也闢辟行人使無干犯 王氏
曰門外之地謂之庭掌掃門庭者以其掌禁宜潔其
所守也設門燎則設燎於門以為明也 注疏燎燭

在地上百根葦皆以布纏之以蜜塗其上若今蠟燭
矣蹕止行人也 劉氏曰祭祀王在廟中大喪以下
王或出送葬蹕宮門廟門以肅王之歸也 鄭氏曰
廟在中門之外 疏曰賓客若饗食在廟燕在寢亦
為設之 王氏曰宮正凡邦之事蹕明所禁止者廣
闔人蹕宮門廟門明所禁止者門而已宮正宮中廟
中則執燭明所照察者內闔人設門燎明所照察者
門而已亦尊卑之辨 雜說內言不出於閫外言不

入於閹無所不禁此周家正家之法家正而天下定矣
寺人

王之正內五人

鄭氏曰寺之言侍也詩云寺人孟子正內路寢也

疏曰此亦奄人為之也寺人披曰豈惟刑臣母乃刑
人歟 雜說幽王之時周之法度無有存者而猶有
寺人傷讒之事夫寺人內臣也得志於君宜若後世
賊忠良招權勢反惡讒如此至欲取之以投畀豺虎

豈不賢哉知先王之時內臣必取剛正能守法者雖當亂世猶惡無禮況成周之時乎 雜說周家冢宰一官凡閹寺嬪御之職服膳筦庫之司皆屬焉先王奚必煩細若是哉嗟夫先王此意不明於天下蓋自冢宰失職而後有女寵之禍有閹寺之變有內藏之私有宮市之患有奢侈百出之弊凡先王治天下之本莫不廢壞焉

掌王之內人及女宮之戒令相道其出入之事而糾之

若有喪紀賓客祭祀之事則帥女宮而致於有司佐世婦治禮事掌內人之禁令凡內人弔臨于外則帥而往

立於其前而詔相之

相息亮反道徒報反臨良鳩反

王氏曰女宮女奚之屬有職於宮中者 鄭氏曰致於有司宮卿世婦也佐世婦則二十七世婦也禮事即世婦職所掌賓客喪紀之事 劉氏曰內人弔臨于卿大夫之喪也 鄭氏曰若哭其族親 鄭氏曰立于其前者賤也賤而必詔相之者出入於王宮不

可以闕於禮

內豎

倍寺人之數

注疏豎未冠者之名左傳叔孫穆子幸庚宗之婦人而生牛以為豎官則亦童子為之耳東萊曰內豎主通小事雜說閤寺既嚴其守然後繼以內豎

掌內外之通令凡小事若有祭祀賓客喪紀之事則為內人蹕王后之喪遷于宮中則前蹕及葬執褻器以從

遣車

為于偽反
遣弃戰反

劉氏曰文王為世子朝於王季日三馬雞初鳴而衣服至於寢門外問內豎之御者今日安否如何內豎曰安文王乃喜則亦侍宿於燕寢之外故曰掌內外之通令凡小事也若大事則非童豎之所可傳焉

鄭氏曰喪遷者將葬朝於廟也褻器振飾類沐之器
竇氏曰遣車鸞車也 王氏曰此事死如事生之意

九嬪

鄭氏曰嬪婦也昏義曰古者天子后立六宮三夫人九嬪二十七世婦八十一女御以聽天下內治以明章婦順故天下內和而家理也不列夫人於此者夫人之於后猶三公之於王坐而論婦禮無官職李氏曰自九嬪下至女史皆屬天官先王之意於是深矣彼婦人女子而當於至尊幽居九重人弗得見則驕蹇自恣無所不至也是故使之分職於內而附屬

於外有職則當奉其法有屬則必攷其功奉法則不敢不謹攷功則不敢不勤舉宮中之人而有勸勉者官有其長之效也而況內宰則用大夫士春官世婦每公卿二人蓋皆分命賢人以參檢內事與夫婢妾賤人自相使令而不復畏忌者不可同年而語矣漢高欲廢太子立戚妃子如意留侯曰骨肉之間雖臣等百人何益此大臣不得與內事之敝也袁盎引卻慎夫人座謂妾主不可以同坐文帝怒說以人豕乃

悅如使盜輩得制宮中之事則尊卑有不序上下有不和者乎官失其守一女專恣幾危國祚而公卿附麗之不暇其何冢宰之能帥也哉

掌婦學之灋以教九御婦德婦言婦容婦功各帥其屬而以時御叙於王所凡祭祀贊玉盥贊后薦徹豆籩若有賓客則從后大喪帥叙哭者亦如之

盥音咨

劉氏曰九嬪之位亞於三夫人是四德之優而奉承於王不失其禮者故使掌婦學之法以教九御女御

幼少故立婦學而以四德教之使知所以事上之道
焉 雜說古者有婦學昏義曰古人婦人未嫁三月
教於公宮已毀則教於宗室觀葛覃之詩序可見

鄭氏曰婦德貞順也婦言辭令也婦容婉婉也婦功
絲枲也 劉氏曰古者立婦學而教之四德四者婦
人立身之大本也周南召南得以擅美於三代者既
行之於前而此又傳之於後則知教化之本原未有
不始於齊家者易稱王假有家勿恤吉者所以治天

下之本乎 鄭氏曰各帥其屬者自九嬪而下九九而相與從於王所息之燕寢御猶進也勸也進勸王息亦相次叙凡羣妃進見之法月與后妃其象也卑者宜先尊者宜後女御八十一人當九夕世婦二十七人當三夕九嬪九人當一夕三夫人當一夕后當一夕亦十五日而徧云自望後反之月初卑者為始月望後尊者為先也 註疏凡祭祀宗廟之祭耳婦人無外事也玉璽玉敦受黍稷器后薦之而不徹則

贊薦之而已若豆籩之薦與徹皆助后后之有事於
賓客謂諸侯來朝后助王燕饗時九嬪從后往當贊
后事也王喪內外命婦哭皆依尊卑命數在后後為
前後列位哭之故須導帥使有次叙

世婦

鄭氏曰序官世婦以下具其名而不言數君子不苟
於色有婦德者充之無則闕 王氏曰執箕帚以事
人者謂之婦記曰納女於天子備灑掃納女者以卑

自稱猶婦人之於姑也婦人之事人有廟嗣之義故謂之世婦 李氏曰自古婦人之賢者蓋不易得故其生則寢之地以教其卑衣之褐以教其正弄之瓦以教之事既十年則姆教婉婉聽從執麻枲治絲繭織紵組紃學女事以共衣服觀於祭祀納酒漿籩豆菹醢禮相助奠十五而笄二十而嫁先嫁三月或教於公宮或教於宗室教以婦德婦言婦容婦功教成之祭祀用魚芼用蘋藻所以成婦順也如是而後備

於從人之道況夫王之六宮當貫魚之寵可以非其人哉後世人主不擇德而以色親甚或取之倡優下賤如漢趙飛燕李夫人之屬是已曲禮納女於天子曰備百姓言以廣子姓耳深山大澤實生龍蛇母子傳類亦不可忽晉愍懷太子宫中為市使人屠沽手揣斤兩輕重不差其母本屠家女也先王之制百二十人猶以無人而缺之至難至慎若此晉武平吳後掖庭萬人復何義也人多則御幸不可偏怨恨由是

興費廣則財用不足支民眊所以困國家之敗何莫由斯者耶

掌祭祀賓客喪紀之事帥女宮而濯概為盥盛及祭之日涖陳女宮之具凡內羞之物掌弔臨於卿大夫之喪

概古
爰反

劉氏曰王與后之祭祀賓客喪紀外有百執事各帥其屬夙夜厥職非不可以備其物致其誠也而必使九嬪世婦躬涖乃事而女御之職又以贊世婦焉蓋

以婦人不事於宗廟賓客喪紀則不知所以事上之道使之豈獨致己之誠哉亦所以役之艱難俾盡其敬也則闕睢之后妃召南之夫人立教於前而周官所帥而習之於後者斯其為教不亦大哉 註疏此婦人所掌祭祀謂祭宗廟也賓客饗食諸侯在廟也喪紀大喪朝廟設祖奠與大喪遣奠時也概拭也少牢禮概鼎俎概甑甗概豆籩之屬為猶差擇也涖臨也內羞房中之羞若糗粢粉飧屬案少牢皆從房中

而來故名爲內羞也 王氏曰籩人醢人共內羞此
世婦泣陳之也九嬪視卿世婦視大夫故王使之往
弔於卿大夫之喪也

女御

鄭氏曰昏義所謂御妻也 王氏曰女御內宮之屬
至卑者也

掌御叙於王之燕寢以歲時獻功事凡祭祀贊世婦大
喪掌沐浴后之喪持翣從世婦而弔臨於卿大夫之喪

嬖所

甲反

疏曰女御掌御叙於王不使九嬪世婦而使女御者
防上之專妬也 雜說女御以時叙御意者在上者
無妬忌之行而惠及賤妾乎觀小星之詩可見 李
氏曰蓋以女御官卑不敢習妬自專則九九之法行
矣九九之法行則內無怨女而子孫衆多矣夫男女
人之大欲一有失時則為怨曠七月女心傷悲東山
婦歎於室君子體於人情周家所以興也安得聚少

女之色幽於深宮之中而無進御之路則其性情之所感動何如哉四時何以能和百神何以降福至於繼社稷之重其有寵之人或不宜子非廣其禮將無及也然則聖人之意遠矣鄭氏曰功事絲枲成功之事大喪王及后之喪娶棺飾也持而從柩車從世婦而弔於卿大夫從之者蓋如使者之介云李氏曰男女之際人之所甚重前哲備言之矣然而賢妃相成之道不世出亂國亡家者往往而是蓋婦人之

性陰昧而柔弱鮮克正也堯之試舜釐降二女以嬪
於虞以觀厥刑焉以堯之女其淵源非不善尚曰舜
能以義理下其心則不漸以教不摩以禮其不能以
行婦道明矣夫后妃同體於王其次嬪御亦所愛幸
一舉事足以旋轉天地薄食日月其為禍福可勝言
哉貴則為驕富則為侈並寵則妬不答則怨憎則有
讒言愛則有私謁府庫或為之空刑賞或為之濫姦
邪或為之昌忠良或為之剝宗室或為之盡冢嗣或

為之易帷薄或為之不修社稷或為之不食妹喜之
殺桀妲己之殺紂此類豈少哉成周內宰之職王宮
之中自王后而下至女御之輩皆受教皆習禮德皆
正言皆順無治容無廢功無侈服無衰道則閨門之
內何有不肅溥天之下何有不化關雎之不淫葛覃
之躬儉樛木之無嫉妬螽斯之多子孫巷耳之輔佐
求賢免置之莫不好德於此見矣王道安得而不成
乎

女祝

之六反

四人奚八人

王氏曰王有大祝小祝而后亦有女祝之官 雜說
夫內宰掌宮中之祭祀矣而復有女祝何也或疑以
為文帝尚除秘祝而先王之時豈有此乎殆漢世執
左道入宮中者為厭勝之道也而不知古人通天人
達幽明動則有祭食祭先飯桑祭先蠶農祭先穡與
夫祭五祀祭先牧祭馬祖之類不一不惟忠厚不忘之

意蓋神所在有之祭則所在皆有外有司巫男巫內有女巫祝所以交三才之道不可不自盡焉

掌王后之內祭祀凡內禱祠之事掌以時招梗禴禳之

事以除疾殃

梗古猛反禴古外反禳如羊反

鄭氏曰內祭祀王之七祀之在內者竈門戶也王

氏曰禱祈福也鄭氏曰祠報福也劉氏曰招梗

禴禳此四事皆祭也疏曰招招取善祥捍禦惡

之未至禴除去見在之災禳推却見在之變異此四

者皆與人為疾殃 雜說先王后妃之賢道化盛行
和氣充塞安有疾殃先王正欲使后知戒懼耳

女史

八人奚十有六人

疏曰女史之於后猶大史之於王

雜說王后有女史視聽言動安得不正

劉氏曰女史八人掌王后之禮職掌內治之貳以詔
后治內政則非有道藝而知禮者不可以為之也鄭

氏以為女奴曉書者非也此蓋擇嬪御之賢者為之歟 橫渠曰周禮女八人為女史令執彤筆在宮中書王后夫人以佐內治宮女德之善惡及進御煩碎之事皆書之故宮女懼而修德

掌王后之禮職掌內治之貳以詔后治內政逆內宮書內令凡后之事以禮從

王氏曰王后之禮各有所職如祭祀則有薦徹賓客則有獻酬之類女史掌之則王后非禮勿動矣 鄭

氏曰內治之法本在內宰女史書而貳之逆內宮鉤
考六宮之計書內令后之令也凡后之事以禮從亦
如太史之從王

典婦功

中士二人下士四人府二人史四人工四人賈四人徒
二十人

鄭氏曰典婦功主婦人絲枲功官之長雜說典婦
功以下三官悉用士人先儒以為此人主奢儉所係

國家利害所關非士大夫為之則害國政矣必不得與內官相關通如女祝女史縫人之類則悉用宦者內人耳

掌婦式之法以授嬪婦及內人女功之事齋凡授嬪婦功及秋獻功辨其苦良比其小大而賈之物書而揭之以共王及后之用頒之於內府

齋音咨苦音古賈音嫁

王氏曰婦人絲枲之功絲以為帛枲以為布其簠簋有常法其多寡皆有常數故曰婦式之法疏曰大

宰九職云嬪婦化治絲枲是國中婦人有嬪婦之稱
鄭氏曰內人女功之事齋謂女功之事來取絲枲
凡授當為受字之誤也國中嬪婦所作成即貢之不
須獻功時辨其苦良分別其縑帛與布紵之麤細皆
比其小大 王氏曰而賈之計其所直 鄭氏曰書
其賈數而著其物 疏曰典絲典枲處入于典婦功
以待王及后之用故頒於內府而藏之

典絲

下士二人府二人史二人賈四人徒十有二人

掌絲入而辨其物以其賈揭之掌其藏與其出以待興
功之時頒絲於外內工皆以物授之凡工之賜予亦如
之及獻功則受良功而藏之辨其物而書其數以待有
司之政令上之賜予凡祭祀共黼畫組就之物喪紀共
其絲纁組文之物凡飾邦器者受文織絲組焉歲終則
各以其物會之

纁音曠織昌志
反會古外反

王先生曰絲入若兗州厥貢漆絲青州厥篚縻絲及

九職之嬪婦所貢及后宮親蠶者以為祭服 疏曰
辨其物絲有麤良善惡不同 王氏曰又以其所直
之賈而揭示之者防其以賤質貴也 鄭氏曰絲之
貢少藏之出之可同官也與功之時若溫煖宜縑帛
清涼宜文繡外工外嬪婦也 王氏曰內工內人也
疏曰以物授之則縑帛受以素絲文繡授以絲絲
王以絲物賜人亦然 王介甫曰典絲受良功而不
受苦功典枲受苦功而不受良功則絲之良麻之良

皆典婦功所受也且典絲所共則祭祀黼畫組就喪
紀組文之物是乃王之致美乎黼冕致孝乎鬼神也
其受良功不亦宜乎鄭氏曰有司之政令若司服
弁師等之政令祭祀共黼畫組就之物以給衣服冕
旒及依盥巾之類白與黑謂之黼采色一成曰就

王先生曰祭祀之用絲者莫急於冕服曰黼畫則其
服也曰組就則其冕也自衮冕九章鷩冕七章而下
皆畫衣而繡裳黼之於裳則繡矣此言黼畫者蓋周

人以黼為尚詩曰玄衮及黼書麻冕黼裳不特此也
巾則皆黼依則設黼席用黼純此典絲之所以黼畫
必首言也天子纁旂十有二就諸侯纁旂九就以組
為冕旒之就曰組就不特此也素絲組之用之於馬
天子佩白玉而玄組綬用之於佩組琮七寸則用之
於玉知組就之為冕旒者以其用之於祭祀耳疏
曰喪紀共其絲者凡裁縫皆用線縷共其纁者喪大
記曰屬纁以俟絕氣是已共其組者士喪禮握手玄

纁著組繫是已青與赤謂之文亦用絲為文繡故連言之鄭氏曰飾邦器茵席屏風之屬各以其物會之種別為計也雜說古之內作不過絲枲縫染以備衣裳冠服耳其黼畫組就等乃上以共祭祀飾邦器故官省簡而財不蠹後世則不然故貢禹曰故時齋三服官輸物不過十笥方今齋三服官作工各數千人一歲費數鉅萬三工官費五十萬東西織室亦然

典泉

司里反

下士二人府二人史二人徒二十人

掌布總縷紵之麻草之物以待時頒功而授齎及獻功受苦功以其賈揭而藏之以待時頒頒衣服授之賜予

亦如之歲終則各以其物會之

故書齎作資

劉氏曰總縷紵皆布名而有精粗之別麻泉麻也草苧葛之屬王氏曰以待時頒功亦以待興功之時頒之於工授齎則授其所以為功之資也與典婦功

同意 鄭氏曰典臬受苦功其良功入于典婦功以共王及后之用 王氏曰頒衣服及賜予皆各以其物授之 王氏曰先王之於婦職王后帥之以蠶內宰又教之以二事九嬪又教之至於婦功與絲臬亦皆有官以典之及其獻功則后受之而內宰佐之典婦功之屬又皆辨其苦良比其小大焉夫尊而王后卑而內人皆相帥以絲臬之事而其詳至於如此其嚴者豈非天下之務唯本之為貴耶男子之務本於

農耕女子之務本於蠶絲苟不忘其本而先之於上則男有餘粟女有餘布而邦之財用所為足也孟子曰無政事則財用不足其庸可忽耶

內司服

奄一人女御二人奚八人

鄭氏曰內司服宮中裁縫官之長 王先生曰王有司服而后曰內司服 註疏內司服縫人皆有女御者以衣服進或當於王廣其禮使無色過也故得與

八十一女御同名欲見百二十人外兼有此女御之禮也

掌王后之六服褱衣揄狄闕狄鞠衣展衣緣衣素紗辨外內命婦之服鞠衣展衣緣衣素紗凡祭祀賓客共后之衣服及九嬪世婦凡命婦共其衣服共喪衰亦如之后之喪共其衣服凡內具之物

褱音暉俞音搖鞠居六反展張彥反緣吐亂反

衰七

雷反

陳氏曰陽數九故王之吉服九陰數六故后之吉服

六王之服九而祭服六后之服六而祭服三以婦人
不與天地山川社稷之祭故也肉宰大祭祀果獻則
贊而天地無祿內宗外宗掌宗廟之祭祀佐王后不
及外神此可以見 鄭氏曰狄並當為翟翟雉名伊
洛而南素質五色皆備而成章曰翬江淮而南青質
五色皆備而成章曰搖王后之服刻繒以為形而彩
畫之綴於衣以為文章褱衣畫翬者其色玄揄翟畫
搖者其色青闕翟闕而不畫其色赤此三者皆祭服

也從王祭先王則服褱衣祭先公則服揄翟祭羣小
祀則服闕翟 王氏曰雉之為物交有時別有倫其
性耿介則正直見乎內身備五色則文明見乎外

鄭氏曰鞠衣黃桑服也色如鞠塵象桑葉始生月令

三月薦鞠衣於上帝告桑事焉

陳祥道曰鞠衣其色黃黃者陰之盛色蠶

而服之以其帥外內命婦而蠶使天下之嬪婦取中焉以見后事之盛也

展衣其色白以

禮見王及賓客之服字當為禮禮之言亶亶誠也詩

國風曰玼兮玼兮其之翟也下云胡然而天也胡然

而帝也言其德當神明又曰璫兮璫兮其之展也下
云展如之人兮邦之媛也言其行配君子二者之義
與禮合矣緣衣者祿衣也御於王之服亦以燕居男
子之祿衣黑則是亦黑也六服備於此矣婦專尚一
德無所兼連衣裳不異色素紗今之白絹也六服皆
袍制以白絹為裏使之張顯今之有紗縠者其名蓋
出於此 王氏曰王后之六服皆以素紗為裏以示其
德之一也素則取其內之純白也紗則取其外之疏

通也 疏曰外內命婦不得有六服惟得鞠衣已下
三服尊卑差次之而已亦皆以素紗為裏 鄭氏曰
內命婦之服鞠衣九嬪也展衣世婦也緣衣女御也
外命婦者其夫孤也則服鞠衣其夫卿也則服展衣
其夫士也則服緣衣三夫人及三公之妻其闕狄以
下乎侯伯之夫人揄狄子男之夫人闕狄唯二王後
褱衣 王氏曰記曰夫人副褱此言上公之夫人也
蓋上公與王同服褱衣則上公之夫人宜與后同服

禕衣矣伯降上公一等則侯伯夫人宜服揄狄子男
又降一等則子男之夫人宜服闕狄矣三夫人視三
公服用闕狄則三公之夫人亦宜服闕狄矣疏曰
后祭祀共三翟賓客共展衣及九嬪世婦謂助后祭
祀賓客時鄭氏曰凡命婦女御與外命婦也臣之
命者再命以上受服則下士之妻不共也外命婦唯
王祭祀賓客以禮佐后得服此上服自於其家則降
焉疏曰后喪所共衣服者謂襲時十二稱小斂十

九稱大斂百二十稱 鄭氏曰內具怱怱線續釁褻之屬

縫人

縫扶用反

奄二人女御八人女工八十人奚三十人

鄭氏曰女工女之曉裁縫者

掌王宮之縫線之事以役女御以縫王及后之衣服喪

縫棺飾馬衣翬柳之材掌凡內之縫事

翬所甲反衣於既反

鄭氏曰線縷也 劉氏曰掌王宮縫線之事以役女

御共王及后之衣服者奄所以董其工而役之裁縫者也女御所以取其制授之修短者也王及后至尊矣非女工之所度量者也鄭氏曰女御裁縫王及后之衣服則為役助之官中餘裁縫事則專為焉孝子既啓見棺猶見親之身既載飾而以行遂以葬若存時居於帷幕而加文繡喪記曰飾棺君龍帷三池振容黼荒火三烈黻三列素錦褚加偽荒纁紐六齊五采五貝黼荒三黼晏二黻晏二畫晏二皆戴圭魚

躍拂池君纁戴六纁披六此諸侯禮也禮器曰天子
八翬諸侯六翬大夫四翬實氏曰柳柳車也鄭
氏曰必先纏其木乃以張飾也王氏曰翬如方扇
持之所以蔽棺柳陰木為之故喪車謂之柳車翬以
木為體用綵繒纏之以為飾故曰衣翬柳之材

染人

染而
險反

下士二人府二人史二人徒二十人

掌染絲帛凡染春暴練夏纁玄秋染夏冬獻功掌凡染

事

王氏曰絲帛之質必待染而後成文 註疏春陽時

陽氣燥達故暴曬其練練其素而暴之謂之暴練

王氏曰幌氏凍絲帛皆晝暴諸日是也 疏曰夏暑

熱潤之時以朱湛丹秫易以和釋故染纁玄而為祭

服也凡六冕之服皆玄上而纁下 王氏曰纁黃而

兼赤色玄赤而兼黑色以其陰陽相雜而成文 疏

曰秋涼時方可染五色夏五色之總名 劉氏曰禹

貢羽畎夏翟羽色自然而成五色者也染夏則染為
五色以象之 疏曰纁玄與夏總染至冬功成並獻
之

追師

追丁
回反

下士二人府一人史二人工二人徒四人

鄭氏曰追治玉之名 疏曰詩曰追琢其璋

掌王后之首服為副編次追衡笄為九嬪及外內命婦
之首服以待祭祀賓客喪紀共笄經亦如之

編必先反

疏曰掌后首服對弁師掌男子之首服 鄭氏曰副之言覆也所以覆首為之飾也其遺象若今步搖矣服之以從王祭祀詩云副笄六珈又祭統曰夫人副褱立於東房編編列髮為之其遺象若今假紒矣服之以桑也次次第髮長短為之所謂髮鬘也服之以見王 王氏日記曰夫人副褱副配褱衣首飾之上也昏禮女次純衣則次配純衣而為之首飾之下也然則編之所配在其中歟故其序如此 疏曰三翟

之首服副也鞠衣展衣編也祿衣次也鄭氏曰治玉謂之追王后之衡筭皆以玉為之唯祭服有衡垂於副之兩旁當耳其下以紃縣瑱詩云玼兮玼兮其之翟也鬢髮如雲不屑鬕也玉之瑱也是之謂也筭卷髮者薛氏曰筭長一尺二寸亦謂之簪鄭氏曰外內命婦衣鞠衣禮衣者服編衣祿衣者服次外內命婦非王祭祀賓客佐后之禮自於其家則亦降焉凡諸侯夫人於其國與王后同王氏曰喪紀筭

而又加之以絰九嬪外內命婦所服亦如之

屨人

下士二人府一人史一人工八人徒四人

掌王及后之服屨為赤舄黑舄赤纁黃纁青舄素屨葛屨辨外內命夫命婦之命屨功屨散屨凡四時之祭祀

以宜服之

纁於立反舄姜踰反散素但反

疏曰首服在上尊故追師弁師分掌之屨舄在下卑

故男子婦人同於屨人掌之 註疏服屨著服各有

屨也凡重底者名舄單底者名屨舄屨有句纒純者飾也纒者牙底相接處綴條於其中句當為絢聲之誤也謂屨頭以條為鼻絢拘也取拘持為行戒純謂以條為口緣凡屨舄各象其裳之色士冠禮曰玄端黑屨青絢纒純素積白屨緇絢纒純爵弁纁屨黑絢纒純是也王吉服有九舄有三等赤舄為上冕服之舄詩云王錫韓侯玄衮赤舄則諸侯與王同下有白舄黑舄王后吉服六唯祭服有舄玄舄為上禕衣之

舄也下有青舄赤舄鞠衣以下皆屨耳絢纁純三者
同色凡屨舄皆有此三者三者相將此欲互見其舄
屨故舉一邊而言耳其色則同也凡舄之飾如纁之
次赤纁者王黑舄之飾黃纁者王后玄舄之飾青絢
者王白舄之飾王及后之赤舄皆黑飾后之青舄白
飾凡屨之飾如纁之次黃屨白飾白屨黑飾黑屨青
飾素屨者大祥時所服去飾者葛屨自赤舄已下夏
用葛為之冬用皮為之此言葛明有用皮時也疏

曰命夫之命屨則纁屨也大夫以上衣冠則有命舄
無命屨命屨中惟士爵弁纁屨而已命婦之命屨則
黃屨以下也以其外命婦孤妻以下內命婦九嬪以
下不得服舄皆自鞠衣以下故用黃屨也其卿大夫
卿妻及二十七世婦則皆以展衣白屨為命屨士妻
及女御則皆以祿衣黑屨為命屨也命夫命婦之功
屨功屨次於命屨於孤卿大夫則白屨黑屨也案司
服孤希冕卿大夫玄冕皆以赤舄為命舄以下仍有

韋弁白屨冠弁黑屨故云次命屨命屨據婦人而言
其實孤卿大夫則功屨次命舄也九嬪亦以白屨黑
屨為功屨內子亦然蓋九嬪與孤妻內子既以黃屨
為命屨功屨之中有展衣白屨祿衣黑屨也世婦則
以黑屨為功屨世婦之命屨既以禮衣白屨矣其功
屨惟有祿衣黑屨也女御士妻則惟有祿衣黑屨為
命屨而已此士妻謂再命受服者方得此屨如王之
中士已上是也若侯伯之士一命子男之士不命及

王之下士皆受職而不受服故其妻亦不得有命屨也 王氏曰命屨則以王命賜之者也 劉氏曰功屨冬之皮屨服功裘者散屨卑者之素屨也 鄭氏曰散屨亦云去飾 王氏曰凡四時之祭祀以宜服之者若吉祭則用赤舄黑舄等喪祭則有素屨散屨皆隨事之宜

夏采

下士四人史一人徒四人

註疏夏采夏翟羽色禹貢徐州貢夏翟之羽夏五色也爾雅有翬與鷩五采皆備而成章此所謂夏翟也有虞氏以為綏綏者注旄於干首也後世或無故染鳥羽象而用之謂之夏采王介甫曰夏采掌大喪之復而置一官則其兼掌明矣王氏曰掌復之官而謂之夏采者采色所以重生之道故也喪則哀素是事死之道也復者所以幸其生故以采色

掌大喪以冕服復於大祖以乘車建綏復於四郊

乘緇證反

綏而
誰反

疏曰大喪王喪也復禮行於始死屬續絕氣之後以招魂也鄭司農曰士喪禮曰士死於適室復者一人以爵弁服升自東榮中屋北面招以衣曰皋某復三降衣於前受用篋升自阼階以衣尸喪大記曰復男子稱名婦人稱字唯哭先復言死而哭哭而復奠其復反故檀弓曰復盡愛之道也望反諸幽求諸鬼神之道也北面求諸幽之義也檀弓又曰君復於小

寢大寢小祖大祖庫門四郊喪大記又曰復者朝服
君以卷夫人以屈狄大夫以玄纁婦人以禮衣士以
爵弁士妻以稅衣雜記曰諸侯行而死於館則其復
如於其國如於道則升其乘車之左轂以其綏復大
夫死於館則其復如於家死於道則升其復車之左
轂以其綏復喪大記又曰為賓則公館復私館不復
夏采天子之官故以冕服復於大祖以乘車建綏復
於四郊大祖始祖廟也 王氏曰死者人之窮也窮

則宜反本太祖子孫之本也故復之於太祖 疏曰
冕服者自衮冕以下六冕及皮弁爵弁等復者各依
命數天子則十二人各服朝服而復於太祖之廟當
升自東雷北面履危西上云皋天子復如是者三乃
卷衣投於前有司以篋受之升自阼階入衣於尸復
而不蘇乃行死事也 鄭氏曰乘車玉路也綏當為
綏字之誤也以旄牛尾為之綴於橦上所謂注旄於
干首者必於太祖四郊求之王平生有事之處也

劉氏曰王之衮冕生常服之奉享於大祖之廟者也
王之大常生建諸玉路乘於四郊以奉祀者也及其
始喪則用以為復而莫測其神魂之奚往也故或以
其服或以其乘或以其建或之其所往而致敬者或
之其所止而素安者或用其所暱而常侍者皋而復
之庶幾其神之復而可生也孝子盡愛之道無所不
至矣是以夏采復於大廟復於四郊祭僕復於小廟
隸僕復於大寢小寢王氏日記曰復盡愛之道也

先王所以愛其親其至誠忠孝以至於此以此而率
天下則民德其有不歸於厚者乎曾子曰慎終追遠
民德歸厚矣夫治而至於民德歸厚其治之大成歟
此夏采之職所以序之於天官之終也



周禮集說卷三